




Ikinyarwanda

Igitabo cy'umwarimu gikubiyemo inkuru zisomerwa abanyeshuri

Umwaka wa 2
w'amashuri abanza



Inkuru zisomerwa abanyeshuri



**Umwaka wa 2
w'amashuri abanza**

© 2013 Rwanda Education Board.

The Rwanda Education Board holds the copyright for the materials in this collection.

This publication is made possible by the support of the American people through the United States Agency for International Development (USAID). The contents are the responsibility of Education Development Center (EDC) and do not necessarily reflect the views of USAID or the United States Government.

Abagize uruhare mu iyandikwa ry'iki gitabo

Abanditse iki gitabo:

Norma Evans (Umuyobozi ushinzwe imfashanyigisho muri L3)
Dusabe Caroline
Uwiragiye Chantal
Ikiriza Hope
Niyitegeka Dative
Rutabingwa Edward

Abajyanama:

Musabe Joyce (Umuyobozi wungirije ushinzwe Ishami ry'Integanyanyigisho muri REB)
Bacumuwenda Nehemiah
Karera Straton

Abakosoye inyandiko:

Ndandali Didace
Mukamuhizi Yvonne

Abashushanyije:

Banza Dolph
Munyurangabo Jean de Dieu
Bizimana Seif
Munyankuyo Celestin
Bazambanza Rupert

Abatunganyije iki gitabo:

Banza Dolph
Irihose Abdul Rahim

Itsinda rishinzwe kwemeza integanyanyigisho n'imfashanyigisho (TAC):

Dr Musabe Joyce (Umuyobozi w'itsinda)
Nshimiyimana Alexis (Umwanditsi)
Gasana Janvier
Ntaganzwa Damian
Rwambonera François
Nyirandagijimana Anathalie
Karera Straton

Ijambo ry'ibazze

Iki gitabo cy'umwarimu gikubiyemo inkuru zisomerwa abanyeshuri kigenewe umwarimu wigisha Ikinyarwanda mu mwaka wa kabiri w'amashuri abanza, cyanditswe mu mwaka wa 2013 n'Ikigo Gishinzwe Guteza Imbere Uburezi mu Rwanda(REB), ku nkunga y'Ikigo cy'Amerika Gishinzwe Iterambere Mpuzamahanga (USAID) binyujije mu Mushinga Ushinzwe Guteza Imbere Uburezi(EDC/L3). Ni igitabo kije gufasha mu gushyira mu bikorwa gahunda yo guteza imbere umuco wo gusoma no kwandika mu cyiciro cya mbere cy'amashuri abanza kugira ngo abana bawukurane kuko ari wo nkingi y'uburezi bufite ireme.

Iki gitabo gikubiyemo inkuru zisomerwa abana mu ishuri buri cyumweru, kizafasha umwarimu guha abana urugero rw'uburyo bagomba gusoma. Inkuru zikubiye muri iki gitabo zizabera umwarimu imfashanyigisho ituma abana bunguka amagambo mashya kandi bakamenya indangamuco n'indangagaciro nyarwanda. Gusomera abana izo nkuru bibatera ishyaka n'inyota yo kwisomera ubwabo ndetse no guhugukira ibyo biga. Kubera ko zimwe mu nkuru zinyuzwa kuri terefoni, bibera abana urugero mu kuvugira mu ruhame kandi bashize amanga.

Mu gutegura iki gitabo, hashingiwe ku mahame y'iyigandero mu bijyanye n'imyigishirize ihamye yo gutoza abana umuco wo gusoma bakiri bato, ku buryo gusomera umwana inkuru zikubiye muri iki gitabo bizamutera inyota n'ishyaka ryo gukurana umuco wo gusoma kandi akawusigasira mu buzima bwe bwose. Ni yo mpamvu mu gutegura iki gitabo hitabajwe impuguke zinyuranye mu by'uburezi ndetse n'imyigishirize y'indimi, cyane cyane ibijyanye no gusoma no kwandika inkuru zigenewe abana kugira ngo kinogere umwarimu kandi kigirire akamaro abanyeshuri.

Turashimira rero abantu bose bagize uruhare mu kwandika iki gitabo kuko bashyigikiye ku buryo bw'umwihariko igikorwa cyo gutoza abana umuco wo gusoma no kwandika bakiri bato. Turasaba kandi abantu bose bazasoma n'abazakoresha iki gitabo gutanga ibitekerezo basanga byatuma kirushaho kunogera abo kigenewe.

Dr. RUTAYISIRE John

Umuyobozi Mukuru w'Ikigo Gishinzwe
Guteza Imbere Uburezi mu Rwanda (REB).

Ishakiro

Igihembe cya 1

Inkuru: Irushanwa ry'ubwiza	1
Inkuru: Impano idasanzwe	19
Inkuru: Nyakabwana yabuze ikibwana cyayo	31
Inkuru: Semacwa yahakuye isomo	41
Inkuru: Ikipe ya Kwezi yegukanye intsinzi	55
Inkuru: Gwera na Gafwana.....	67
Inkuru: Majuyjuri na Kajyunguri.....	81
Inkuru: Imvubu Myasiro.....	95

Igihembe cya 2

Inkuru: Utugurube dutatu.....	111
Inkuru: Ubutwari bwa Nyiramapyisi.....	127
Inkuru: Rwagakoco.....	139
Inkuru: Abana ba Twiga bararwaye	153
Inkuru: Busyete yagize igitekerezo cyiza	167
Inkuru: Umunyamatsiko Nyirahovwa.....	183
Inkuru: Inkoni y'amayobera.....	195
Inkuru: Isupu y'igishuhe.....	217

Igihembe we cya 3

Inkuru: Impano ishimishije.....	233
Inkuru: Icyungo gitangaje.....	251
Inkuru: Amategeko y'inyamaswa.....	269
Inkuru: Ngabo n'insenda	287
Inkuru: Uruyuzi rudasanzwe	303
Inkuru: Inka ya Karangwa yarazimiye	319
Inkuru: Turwanye isuri	335
Inkuru: Amayeri y'imbeba.....	348

Iriburiro

Kuva ku munsi wa mbere abana bakigera ku ishuri, bishimira kubona ibitabo no gutangira kubikoresha. Abana biyubakamo umuco wo gukunda gusoma iyo bagize amahirwe yo gusomerwa inkuru zitandukanye. Gusomerwa inkuru inshuro nyinshi zishoboka ni bumwe mu buryo bwo kumenyereza abana gusobanukirwa n'ibyanditse mbere y'uko batangira kwisomera ubwabo.

Iki gitabo gikubiyemo inkuru mwarimu asomera abana bo mu mwaka wa kabiri w'amashuri abanza. Inkuru zisomerwa abana ni bumwe mu buryo bukoreshwa mu kwigisha gusoma no kwandika. Ubu buryo bushya bw'imyigishirize y'lkinyarwanda buteganya inkuru mwarimu azajya asomera abana buri cyumweru. Buri nkuru ishingiye ku nyuguti cyangwa igihekane kizigishwa muri icyo cyumweru. Iyi nkuru kandi ikomeza gukoreshwa mu masomo yose y'icyo cyumweru.

Mwarimu aboneraho umwanya wo guha abana urugero rw'uburyo bagomba gusoma inkuru. Abana basomerwa inkuru zinyuranye bunguka amagambo mashya. Uko abana bagenda barushaho kunguka amagambo mashya, ni na ko bagenda barushaho gutekereza cyane, bagatanga ibitekerezo byabo, kandi bagafata ibintu bishya bigishijwe ku buryo bworoshye.

Inkuru zisomerwa abana kandi ni ikigega mwarimu ashobora kuvomamo amagambo cyangwa se interuro ziganjemo inyuguti cyangwa igihekane biga muri icyo cyumweru. Urugero: Mwarimu ashobora kongera gusoma igika runaka cy'inkuru maze agasaba abana gushaka amagambo arimo inyuguti cyangwa igihekane byigwa muri icyo cyumweru. Mwarimu ashobora no kwandika ayo magambo ku kibaho, agasaba abana kuyamusomera.

Izi nkuru zisomerwa abana zizakoreshwa mu myigishirize y'lkinyarwanda kuva mu mwaka wa 1 kugera mu wa 3 w'amashuri abanza. Ni ngombwa ko mwarimu ari we uzsomera abana kuko ziba zirimo inyunguramagambo n'uburyo bw'imyandikire birenze ikigero cy'abana. Inkuru za buri cyumweru kandi zumvisha abana ko inkuru igira intangiriro, igihimba ndetse n'umusozo kandi ikaba yubakiwe ku kibazo gikeneye gukemurwa. Ubwo bumenyi bufasha cyane abana kumva inkuru bisomera ubwabo.

Amasomo anyuzwa kuri telefoni azabera abarimu urugero ku buryo bashobora gusomera abana inkuru kandi neza. Imbata z'amasomo ziri mu gitabo cy'umwarimu na zo zikubiyemo ibisobanuro ku buryo mwarimu yasomera abana inkuru n'uburyo iyo nkuru ikoreshwa mu masomo yose y'icyumweru.

Iki gitabo gikoreshwa gite?

Mbere yo gusomera abana

Mwarimu yereka abana igifuniko cy'inkuru akababaza ibibazo bikurikira: Ni iki mubona? Muratekereza ko inkuru iza kuvuga ku ki? Kubera iki? Hanyuma akabasomera umutwe w'inkuru.

Mu gihe cyo gusomera abana

Mwarimu afata igitabo neza ku buryo abana bose babasha kubona ibishushanyo, hanyuma akabasomera inkuru yose agenda aberekira ibishunyo kugeza irangiye. Mu gihe mwarimu asomera abana inkuru, ni ngombwa gukoresha amarangamutima n'isesekaza bijyanye n'ibivugwa mu nkuru.

Nyuma yo gusomera abana

Mwarimu aha abana umwanya wo gutekereza ku nkuru. Ashobora kubabaza ibibazo bitanu by'ingenzi bibafasha kwibuka ibyo amaze kubasomera.

Kongera gusoma inkuru

Mwarimu yongera gusomera abana inkuru bakavuga ku magambo akomeye cyangwa se akababaza amakuru mashya bakuyemo ndetse bakanageraranya ibivugwa mu nkuru n'ubuzima bwabo busanzwe. Ibibazo bikurikira byafasha muri uyu mwitoto: Ni nde wakunze kurusha abandi muri iyi nkuru? Kubera iki? Ni ikihe gice cy'inkuru wakunze kurusha ibindi? Kubera iki? Uratekereza ko byagenze bite nyuma y'uko inkuru irangira? Kubera iki? Hari ibantu nk'ibi bivugwa mu nkuru byigeze bikubaho? Niba ari yego, byagenze bite?


Gusubiramo inkuru

Mu gusubiramo inkuru mwarimu ashobora kwifashisha uburyo bukurikira: Ibishushanyo, ibibazo bitanu by'ingenzi, gukina ibyabaye mu nkuru, kuvuga ibyabaye mu ntangiriro, rwagati no mu mpera y'inkuru...


Abarimu barashishikarizwa gusomera abana izi nkuru nk'uko bitemganyijwe no gukoresha imyitoto ijyanye na zo. Ibi bizafasha cyane mu kwigisha abana ururimi rw'ikinyarwanda no mu guteza imbere umuco wo gusoma.

Igihembe cya 1


Irushanwa ry'ubwiza.



Yanditswe na L3 Initiative
Yashushanyijwe na Rupert Bazambanza



Igihe kimwe, intare umwami w'inyamaswa
yaribwiye iti "nkwiriye kumenya inyamaswa irusha
izindi ubwiza mu nyamaswa zanje zose." Nuko
itumira inyamaswa zose kuza mu nama.



Ikinyugunyugu, cyarimo cyitemberera mu ndabyo nziza. Cyumvise ubwo butumire, cyitegura vuba na vuba, cyihutira kugera **ibwami**. Inzovu yari irimo yiruhukira munsi y'igiti kinini cy' **Umunyinya**. Yumvise ubwo butumire, na yo itangira kwitegura vuba vuba, yihutira kugera ibwami.


Twiga yo, yari irimo irisha amababi y'igiti kirekire cy' umwembe. Yumvise ubwo butumire, na yo itangira kwitegura vuba vuba. Nuko yihutira kugera ibwami.


Intashya, yari yiyicariye mu cyari cyayo cyari mu giti cy' avoka. Nuko yumvise iyo nkuru, yihutira kuguruka ngo igere ibwami.

Igikeri cyarimo gusinzirira ku mababi y'amarebe, cyumvise ubwo butumire, kirataruka cyihutira

Inyamaswa zose zo mu ishyamba ziteranira
imbere y'umwami w'ishyamba.

Nuko intare umwami w'ishyamba irazibwira
iti “nateguye irushanwa ry'ubwiza. Ndashaka
kumenya inyamaswa nziza muri mwe. Ndashaka
kumenya inyamaswa zose z'ishyamba. Iryo
rushanwa rizaba ejo, maze inyamaswa izaba iya
mbere mu bwiza, ikazahembwa bishimishije.”






Ikinyugunyugu kibyumvise, cyitera hejuru
kiraguruka. Kikajya iburyo, kigaruka ibumoso. Nuko
ikinyugunyugu kikajya kivuga kitii “nimundebe
mwese! Ni jye mwiza. Mfite amababa meza, mfite
amabara meza, ni jye uzatsinda iri rushanwa!”




Muri ako kanya, inzovu ireba igikona, izamura umutonzi wayo. Iravuga iti “ndebe! Ni jye mwiza. Mfite umutonzi mwiza, mfite umubiri unoze. Mfite n'ingendo nziza. Ni jye uzatsinda iri rushanwa.”




Ako kanya, Twiga ikebuka ikinyugunyugu,
izamura ijosi. Iratambuka maze irakibwira iti
“ndebe! Ni jye mwiza! Mfite ijosi ryiza rirerire! Ni jye
uzatsinda iri rushanwa!”

Intashya na yo ikebuka isha, irayibwira iti
“ndebe! Ni jye mwiza. Mfite amababa meza. Ni
jye uzatsinda iri rushanwa!”



Muri ako kanya, ikinyugunyugu, inzovu, igikona, Twiga, isha n'intashya zikebuka igikeri aho cyari gisutamye. Ziragiseka cyane! Ziravuga ziti “cyo se Gikeri, reba ukuntu uri mubi! Reba ayo **magaragamba** yawe! Wowe ntuzatsinda irushanwa rwose!” Igikeri kireba umubiri wacyo kiravuga kitit “ni byo koko! Sindi mwiza, sinshobora gutsinda irushanwa!” Nuko amarira akajya ashoka ku maso yacyo. Kiribwira kitit “reka nibura mfashe bagenzi banje kwitegura irushanwa.”

Igikeri gifasha ikinyugunyugu kwisiga, kugeza ubwo amababa yacyo arabagirana. Igikeri gifasha inzovu gusukura umutonzi wayo kugeza ubwo ubengerana. Igikeri gifasha intashya gusukura amababa yayo kugeza ubwo ashashagirana. Igikeri gifasha igikona gusukura umubiri wacyo, kugeza ubwo ubengerana. Igikeri gifasha isha gusukura ubwoya bwayo, kugeza ubwo burabagirana. Igikeri gifasha Twiga gusukura ijosi ryayo, kugeza ubwo rirabagirana. Intare umwami w'inyamaswa zose, yari yicaye yitegereza uko igikeri gifasha izindi nyamaswa kwisukura.





Ku munsi w'irushanwa, inyamaswa zose zizindukira ku iriba. Zirakaraba, zirakarabaaa, zirikuba zirikubaaa, zisiga amavuta meza umubiri wose, zoza n'amenyo yazo. **Zitoza** kugenda **zikimbagira**, zitoza kurata ubwiza bwazo.


Nuko cya gikeri cyicara ahirengeye cyitegereza za nyamaswa zose. Kikajya kireba uko za nyamaswa zose zitegura, maze kikishima kigaseka.



Igihe cy'irushanwa kigeze, za nyamaswa zose ziteranira ibwami. Zikajya zinyura imbere y'umwami, imwe imwe. Za nyamaswa zikikaraga, zikagumya kwiyereka. Buri nyamaswa ikavuga iti "mwami, reba ni jye mwiza mu nyamaswa zose! Ishimwe ni jye **uryegukana!**"

Inyamaswa zose ziriyerekaa! Intare ikajya yitegerezza uko buri nyamaswa itambuka. Intare ikomeza kureba uko buri nyamaswa inyura imbere yayo yiyerekaa, kugeza ubwo zose zirangiza.

Hanyuma irazibwira iti “ncuti zanje, buri wese muri mwe yakoze uko ashoboye ngo yitegure iri rushanwa. Inzovu ifite umutonzi mwiza, ikinyugunyugu na cyo gifite amababa meza. Intashya ifite amababa meza, isha na yo ifite amabara meza. Twiga ifite ijosi ryiza, igikona na cyo gifite amababa n'amabara meza, nyamara inyamaswa nziza muri mwese, ni inyamaswa ifite umutima mwiza kurusha izindi.”



Uwo mwanya, intare umwami w'ishyamba irahaguruka. Ifata **ikamba** ry'ishimwe ryari ryateguwe, iryambika igikeri, kuko cyarushije izindi nyamaswa umutima mwiza.



Inyunguramagambo

- **ibwami:** aho ingoro y'umwami iri.
- **umukindo:** igitu cy'umutako giterwa mu busitani no ku mihanda.
- **amagaragamba:** amaga menshi yo ku ruhu rwa zimwe mu nyamaswa nk'ingona, inzoka, n'igikeri.
- **kwitoza:** kwimenyereza gukora ikintu , kwiga kugikora.
- **gukimbagira:** kugenda gahoro n'amafiyeri utambuka wiyeraka abakureba.
- **gwegukana:** gutsindira ikintu cyapinirwaga.
- **ikamba:** ingofero ikoze mu kintu cy'agaciro ihabwa uwatsinze irushanwa.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo, uye ubasaba kuzamura urutoki rumwe rumwe, bakubwire igisubizo.

1. **Ni izihe** nyamaswa zivugwa mu nkuru?
2. **Ni hehe** inkuru yabereye?
3. **Ni iki** cyabaye ku nyamaswa zose zo mu ishyamba?
4. **Ni ryari** irushanwa ry'ubwiza ryabaye?
5. **Kuki** igikeri cyatsinze irushanwa ry'ubwiza?

Impano idasanzwe



Yanditswe na L3 Initiative
Yashushanyijwe na Seif Bizimana



Ikinyogote Nyirabyuma cyari ikinyogote kidasanzwe. Iyo cyagiraga ubwoba cyaratengurwaga, kikikunkumura, kikabira n'ibuya. Nuko amahwa yacyo akakivamo, akagwa ahantu hose!

Amahwa yacyo yari atyaye nk'ibyuma. Iyo **kikunkumuraga**, ayo mahwa yaragendaga agatobora inyanya nziza z'inkima yitwa Byano, zabaga ziri mu byibo. Ubundi, ayo mahwa akagenda akagwa mu murima w'ubunyobwa bw'akayongwe Minyaruko.



Umunsi umwe, imvura yarakubye, ikinyogote
Nyirabyuma kirabukwa **umurabyo** kigira ubwoba.
Urukwavu Byusa rwari rwicaye munsi y'igiti
cy'umunyinya cyari hafi aho rurimo rusoma
ikinyamakuru. Rwahugiye mu byo gusoma,
rugiye kubona rubona amahwa y'ikinyogote
anyanyagiye muri icyo kinyamakuru.

Inyamaswa zose zari zituye hafi aho zari **zibangamiwe** no guturana n'ikinyogote Nyirabyuma. Ikinyogote Nyirabyuma cyamishaga amahwa yacyo impande n'impande iyo cyabaga gifite ubwoba.

Inyamaswa zose, iyo zakibonaga kije zahitaga ziruka zikajya kwihihsa. Ibinyugunyugu byahitaga biguruka, bikajya kwihihsa mu mababi y'indabo ndende. Inyon'i zahitaga zisiganwa, zikajya kwihihsa mu mashami y'igiti cy'umunyinya.


Utwana tw'injangwe twahitaga tureka gukaraba tukirukira mu myobo hafi aho. Ibyana by'inyamaswa byose byahitaga **byihindira** inyuma ya za nyina.



Nta nyamaswa n'imwe yifuzaga kuba incuti na Nyirabyuma kubera icyo kibazo. Ikinyogote Nyirabyuma cyo, cyifuzaga kugira incuti nyinshi.

Umunsi umwe, ikinyogote nyirabyuma cyari cyicaye ku nkengero z'ikibuga cy'umupira kireba umukino w'inkima Byano n'akayongwe Minyaruko. Byano na Minyaruko zarimo zikina zishimye, ziseka.

Zarasekaga cyane ku buryo zitabonye Byinyo imbwa y'umuturanyi wabo yazaga izisanga n'uburakari bwinshi. Byinyo yari yaciye umunyururu, maze igenda irabya indimi, itekereza uburyo igiye kurya Byano na Minyaruko.




Ikinyogote Nyirabyuma kiyirabutswe cyahise gikanura amaso. Mu kanya gato, cyari cyatangiye gutitira, kwikunkumura no kubira ibuya.

Cyahumirije rimwe, kirikunkumura maze amahwa yacyo ahita atangira gukwirakwira hose! Cyakomeje guhumiriza, kigiye kumva cyumva urusaku rwinshiii. Gifungura ijisho rimwe buhoro, gisanga ni ya mbwa Byinyo, yarimo yiruka ikibuga cyose itaka cyane. Amahwa y'ikinyogote yari ayuzuye umubiri wose.


Byano na Minyaruko zo, zari zihagaze nk'ibiti mu kibuga zayobewe ibyabaye. Zitegereje ikinyogote Nyirabyuma, zitegerezza imbwa Byinyo n'uburyo yarimo yiruka mu kibuga itaka cyane.

Zakomeje kwitegerezza izo nyamaswa zombi, buhoro buhoro zibona ko Nyirabyuma ikinyogote inyamaswa zose zidashaka kuba incuti na cyo, ari cyo cyabakijije Byinyo.



Ijoro ry'uwo munsi, ijuru ryari ryuje inyenyeri.
Inyamaswa zose zarakoranye zishimira ikinyogote
Nyirabyuma zinagisaba kuzajya kizirinda no
kurinda **icyanya** cyazo.

Kuva ubwo ikinyogote Nyirabyuma cyagize
incuti nyinshi cyane. Kuva ubwo kandi, iyo
cyatangiraga gutitira, kwikunkumura no kubira
ibuya, izindi nyamaswa ntizabibonagamo
ikibazo. Zamenye ko ikinyogote Nyirabyuma
kifitiye impano idasanzwe.



Inyunguramagambo

- **kwikunkumura:** kwitigisa.
- **umurabyo:** urumuri rwihuta cyane ruranga inkuba.
- **kubongamirwa:** kubuzwa amahoro n'umutekano.
- **byihindira:** byirukira ahantu bijya kwihihsa.
- **icyanya:** agace kihariwe n'inyamaswa.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo, ujye ubasaba kuzamura urutoki rumwe rumwe, bakubwire igisubizo.

1. **Ni izihe** nyamaswa zivugwa mu nkuru?
2. **Ni hehe** ikinyogote Nyirabyuma cyari kumwe n'insuti zacyo mu nkuru?
3. **Ni iki** cyabaye ku kinyogote Nyirabyuma igithe cyagiraga ubwoba?
4. **Kuki** mbere inyamaswa zose zirukaga zihunga ikinyogote?
5. **Ni iki cyatumye** inyamaswa zose zikigarukira?

Nyakabwana yabuze ikibwana cyayo



Yanditswe na L3 Initiative
Yashushanyijwe na Rupert Bazambanza



Igihe kimwe, Bwiza yari mu ishuri ariko
yitekerereza **ibibwana** yari yasize mu rugo.
Yifuzaga ko amasomo arangira vuba,
akajya kureba ibibwana bitanu imbwa ye
Nyakabwana yari imaze iminsi ibwaguye.
Ikibwana kimwe cyari umukara nka
Nyakabwana, ibindi bifite ibara ry'umweru. Bwiza
yabonaga ari byo bibwana byiza cyane ku isi.
Yifuzaga gutaha vuba maze agakina na byo.
Nuko inzogera yo gusoza amasomo ivuze,
ahaguruka vuba vuba mu mwanya we. Asezera
mwarimu we Mwemezi, asohoka mu muryango
yihuta ngo agere mu rugo mbere y'uko bwira,
maze abone igihe cyo gukina n'ibyo bibwana.



Bwiza ageze mü murima wari hafi y'ishuri, yahasanzé Gasarabwe arimo acukura umwobo wo guteramo insina. Gasarabwe yahise atangira kubaza Bwiza amakuru ye, ariko Bwiza ahita amubwira ati “nyakabwana **yabwaguye** ibibwana bitanu, ndihuta ndashaka kujya gukina na byo.”

Gasarabwe ashyira isuka hasi ngo abaze Bwiza ibyo ari byo, ariko abona Bwiza ararenga yiruka.



Bidatinze, Bwiza aba ahingutse ku isoko ry'imboga. Aho ku isoko, **umwari** Uwamwiza yari arimo ahakubuza umweyo muremure. Uwamwiza yahise atangira kubaza Bwiza amakuru ye, ariko Bwiza ahita amubwira ati "nyakabwana yabwaguye ibibwana bitanu, ndihuta ndashaka kujya gukina na byo." Uwamwiza ashyira umweyo hasi ngo abaze Bwiza ibyo ari byo, ariko abona Bwiza ararenga yiruka.



Bwiza yakomeje kwiruka, ageze imbere atunguka ku nyubako, aho Bwenge yari arimo atera umucanga ku nzu akoresha **umwiko**. Bwenge yahise atangira kubaza Bwiza amakuru ye, ariko Bwiza ahita amubwira ati “nyakabwana yabwaguye ibibwana bitanu, ndihuta ndashaka kujya gukina na byo.” Bwenge ashyira umwiko hasi ngo abaze Bwiza ibyo ari byo, ariko abona Bwiza ararenga yiruka.



Bwiza agitunguka mu marembo, uwo mwanya
Nyakabwana itangira kumoka. Bwiza yegera
Nyakabwana kugira ngo arebe ikibazo ifite.
Nyakabwana ikomeza kumoka, irushaho kumoka
cyane.



Ibyo, byatumye abaturanyi bose baza kureba ibyabaye.

Uwamwiza, ni we wahageze bwa mbere. Yaje yihuta **umwitero** we uguruka kubera umuyaga. Yari afite mu ntoki ze umweyo. Nuko arabaza ati “kuki Nyakabwana irimo imoka?”

Mbere y'uko Bwiza asubiza, Gasarabwe na Bwenge, baba barahageze. Gasarabwe yari afite isuka mu ntoki, Bwenge we afite umwiko mu ntoki. Nuko babaza Bwiza bati “kuki Nyakabwana irimo imoka?” Bose bashakaga kumenya impamvu Nyakabwana irimo imoka cyane. Bwiza arasubiza ati “simbizi”. Nuko amarira atangira gushoka ku matama ye.



Ako kanya, Bwenge aratekereza. Ahamagara Bwiza aramwegera maze aramubaza ati “Bwiza we, ntiwatubwiye ko Nyakabwana yabwaguye ibibwana bitanu?” Bwenge aravuga ati “nimurebe mwese.” Nyakabwana iramoka kuko yabuze ikibwana kimwe mu bibwana byayo.

Nuko Bwiza arekera aho kurira, aratangira abara yitonze bya bibwana ati “ikibwana kimwe, ibibwana bibiri, ibibwana bitatu, ibibwana bine.” Bwiza atera hejuru ati “ikibwana kimwe kirabura! Ikibwana cy’umukara! Ni yo mpamu koko Nyakabwana irimo imoka cyane! Reka tugishakashake.”



Bwenge, Gasarabwe , Uwamwiza na Bwiza batangira gushakashaka cya kibwana cy'umukara. Bashakira mu busitani, bashakira mu murima w'ubunyobwa, bashakira mu mwobo, bashakira ahantu henshi, barakomeza barashakashaka.

Batangiye kurambirwa, Bwiza abona urugi rw'inzu ishaje yari hafi aho, rukinguye. Yinjiramo, abona ntihabona neza. Aritegereza abona ikintu cy'umukara cyari kiriyame mu mfuruka gisinziriye cyane. Aracyegera abona ni cya kibwana cy'umukara! Aragiterura agisubiza mu rugo. Nyakabwana ibonye Bwiza azanye ikibwana cyayo cy'umukara irishima, irekera aho kumoka.

Inyunguramagambo

- **kubwagura:** kubyara kw'imbwa.
- **ibibwana:** ibyana by'imbwa.
- **umwari:** umukobwa .
- **umwiko:** igikoresho cyo mu bwubatsi, bagikoresha bayora umucanga uvanze n'isima bawutera ahubakwa, cyangwa bahasisgiriza.
- **umwitero:** umwambaro w'abagore bambara hejuru ukajyana n' mukenyero.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo, ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa mu nkuru?
2. **Ni hehe** Bwiza yagiye yihuta cyane nyuma y'amasono?
3. Nyakabwana yari imeze **gute** igihe Bwiza yageraga mu rugo?
4. **Ni iki** Bwiza n'abaturanyi be bakoze kugira ngo bafashe Nyakabwana?
5. Nyakabwana yakoze **iki** ibonye Bwiza ayizaniye ikibwana cyayo?

Semacwa yahakuye isomo



Yanditswe na L3 Initiative
Yashushanyijwe na Rupert Bazambanza



Umunsi umwe, Cyimana yahamagaye Semacwa ati “ngwino ku meza.” Nyamara Semacwa yari aryamye mu busitani yitegerezza ikirere.

Yitegerezaga utunyamaswa twatemberaga hafi aho mu **micwira** yamasaka yari mu murima hafi aho mu gacyamo.

Semacwa yakundaga kurangarira utunyamaswa no guhimba udukuru ku byo yabonaga. Nuko Cyimana abonye ko Semacwa yacweje arongera aramuhamagara bwa kabiri ariko Semacwa aguma **gucweza** ntiyamwitaba.




Cyimana abonye ko atamwitabye yongera ijwi, amuhamagara bwa gatatu ati "Semacwa weee!" Noneho Semacwa ashigukira hejuru yumva ijwi rirenga rya nyirasenge Cyimana. Semacwa arahaguruka, nuko yiruka agana mu rugo. Yumva icyuma, ikiyiko n'amasahani bikomangana inyuma y'igikoni. Arabukwa igitenge cya nyirasenge Cyimana wari mu gikoni maze yumva n'impumuro nziza.

Nuko Semacwa yitaba Nyirasenge Cyimana mu ijwi rinini, ati "ndi hano." Cyimana yari afite icyokere kubera ubushyuhe bwo mu gikoni. Nuko yihanagura icyuya mu maso maze aramubwira ati "ngwino ku meza maze ufungure." Cyimana yari acigatiye igisorori cy'isombe ihumura neza n'**icwende** ry'amavuta.



Nuko nyirasenge Cyimana yihanagura icyuya cyatembaga ku ruhanga. Abwira Semacwa ati “nurangiza kurya, wibuke koza ibyombo. Ubu ngiye hafi y’umugezi wa **Cyohoha**, ndashaka kwahira icyarire, hanyuma nsarure amasaka n’imyumbati y’imicyacyari”. Semacwa amusubiza vuba ati “ni byo rwose.”



Muri icyo gihe, nyirasenge Cyimana yiteguraga kuva mu rugo. Mbere y'uko ahaguruka mu rugo yabwiye Semacwa amwihanangiriza ati “uramenye ntiwegere umuriro wo gacwa we, dore amakara aracyagurumana ku mbabura!” Semacwa asubiza Cyimana arangaye ati “yego mase” Yari arangariye **icyari** cy'intashya cyari mu giti kiri hafi y'urugo. Nuko nyirasenge Cyimana asohoka mu rugo agenda yihuta cyane.



Mu gihe Nyirasenge Cyimana yari amaze kugenda, Semacwa yajagajaze ahari harunze ibyungo n'amasahani bitogeje, abona mu gikoni amakara yaka, aribwira ati "mbega byiza! Ubu mbere yo koza ibyombo, ngiye guteka icyayi ninywere." Ako kanya Semacwa afata icyemezo cyo guteka icyayi. Semacwa yuzuza amazi mu isafuriya, hanyuma ayitereka ku mbabura nk'uko yajyaga abona nyirasenge abikora.



Ako kanya Semacwa abona **icyugu** cyatondagiraga ku **cyima**. Semacwa aracyitegereza cyane. Akareba ukuntu icyo cyugu gitondagira ku cyima, maze akabona gisa nka mukerarugendo. Semacwa yabonaga icyo cyugu na cyo gishaka kumenya ibintu byinshi.

Muri ako kanya, Semacwa yongera kwirangarira. Mu gihe yari ategereje ko amazi abira, anyarukira inyuma y'urugo, yerekeza mu macyamo ahari icyuzi. Icyo cyuzi cyari cyuzuye amazi kubera imvura yari imaze iminsi igwa. Icyo cyuzi cyarimo udusimba duto twagendagendagamo.

Semacwa abona icyo cyuzi hafi y'umucyamu. Nuko Semacwa aracyegera. Aracyitegerezza, maze abona ari nk'inyanja ndetse abonamo udukoko duto. Akareba uko utwo dukoko tuzamuka twongera tumanuka mu mazi, maze akabona bisa nk'abasirikari bamanukira mu mutaka baturutse mu ndege, nk'uko yigeze kubibona mu mafirimbi.




Muri uko guheranwa n'uburangare, Semacwa ntiyigeze yibuka amakara yaka umuriro mu mbabura. Yatangiye kugurumana bikabije. Nuko Semacwa arihuta ajya mu gikoni kureba ko icyayi cyabize. Ako kanya abona umuriro wagurumanye ku buryo ibyari mu gikoni byose byari byafashwe n'**inkongi**.

Nuko Semacwa yicwa n'ubwoba, abira icyuya, akajya atabaza abaturanyi asakuza ati “nimudutabare mwo gacwa mwe! Nimudutabare mwo gacwa mwe!”

Abaturanyi ba Semacwa babonye umwotsi baza birukanka. Bayora umucanga mwinshi maze bakajya basuka mu **kibatsi** cy'umuriro kugeza ubwo uzima. Igihe nyirasenge Cyimana yahindukiraga, hari hasigaye gusa ibirundo by'ivu aho imbabura yari iteretse.



Muri iryo joro, abayobozi b'umudugudu
begeranyije abana bose, abakuru n'abato
babasobanurira uburyo bwo kwirinda umuriro.
Abana bigishijwe kudakinisha umuriro cyangwa
ibibiriti. Bigishijwe kandi ko batagomba gusiga
umuriro waka by'umwihariko igihe barangariye
mu mikino yabo.



Inyunguramagambo

- **imicwira:** amasaka ashibuka mu gisigati cy'amasaka.
- **gucweza:** guceceka.
- **icwende:** agacuma gato kasamye babikagamo amavuta y'inka.
- **Cyo hoha:** ikiyaga kiri mu mu majyepho y'u Rwanda .
- **icyari:** uburaro bw'inyoni zubaka zikoresheje ibyatsi akaba ari naho ziterera amagi.
- **icyugu:** agasimba kameze nk'umuserebanya ariko ko kaba ari kanini kaba mu bigunda no ku nkuta z'inzu.
- **icyima:** umutiba w'inzuki.
- **inkongi / ikibatsi cy'umuriro:** ibishashi by'umuriro ugurumana.


Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo, ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa mu nkuru?
2. Semacwa baramuvugaho **iki** mu ntangiriro y'inkuru?
3. **Byagenze gute** mu gihe Cyimana yari yagiye mu murima?
4. **Kuki** umuriro wagurumanye ugatwika igikoni?
5. **Ni gute** abaturanyi bakemuye ikibazo?

Ikipe ya Kwezi yegukanye insinzi




Yanditswe na L3 Initiative
Yashushanyijwe na Rupert Bazambanza



Kera habayeho udukwavu dutatu. Utwo dukwavu twari incuti magara. Agakwavu ka mbere kari gafite umutwe munini kandi ukomeye. Wari ukomeye cyane nk'**inyundo** ku buryo kawifashishaga mu gukingura inzugi. Bakitaga Rutwe.

Agakwavu ka kabiri ko kari gafite ibirenge binini cyane. Kambaraga ibikweto bidasanzwe. Bakitaga Bikweto. Kari kazi gukina umupira, kagatera umupira kure cyane.


Agakwavu ka gatatu kari gafite amatwi adasanzwe. Amatwi yako yabashaga kumva ibintu bivugiwe mu birometero igihumbi. Amatwi yako kandi yabashaga kumva ibintu abantu bahwihwisa bari kure. Bakitaga Matwi.



Utwo dukwawu Rutwe, Matwi na Bikweto twakundaga gukina umupira. Twakinaga mu ikipe y'umupira w'amaguru yitwa Kwezi.


Umunsi umwe ikipe ya Kwezi yitabiriye amarushanwa y'umupira w'amaguru. Yagombaga gukina n'ikipe yitwa Twese. Ikipe ya Twese yari izwiho gutsindira ibikombe kubera gutanga **ruswa**. Yari izwiho kandi gukoresha andi mayeri kugira ngo itsinde.

Umwaka ushize, ikipe ya Twese yatsindiye igikombe. Ariko iyo kipe yari yahaye umusifuzi amavuta y'Ibihwagari kugira ngo abibire amanota. Uyu mwaka noneho udukwawu two mu ikipe ya Twese twashatse ubundi buryo bwo gutsindira igikombe.



Udukwavu two mu kipe ya Twese twari twitwaje **ibikwasi n'amahwa**. Twateganyaga kujomba udukwavu two mu ikipe ya Kwezi iyo twabonaga turi hafi yo gutsindwa igitego.

Udukwavu two mu ikipe ya Kwezi two, twari twazanye umurava mwinshi. Twizeraga ko turi butsindire igikombe. Twari twizeye ko ka Rutwe kaza gukoresha umutwe munini wako mu gutsinda igitego. Ka Bikweto ko, kagatera umupira kure neza kandi vuba. Agakwavu Matwi ko, kari gukoresha amatwi adasanzwe yako mu kubumvira ibyo udukwavu two mu kipe ya Twese tuvuga.



Nuko igihe cy'umukino kigeze udukwavyu two mu
ikipe ya Kwezi n'utwo mu ikipe ya Twese twegera
ikibuga cy'umupira. Tukajya twumva abaje
kureba umukino barimo kuririmba bati "Kwezi,
Kwezi, Kwezi!" Abandi bati "Twese, Twese, Twese!"

Bidatinze umusifuzi witwa Bihwahwa avuza ifirimbi yo guhwitura abakinnyi bose ngo “twiii.” Nuko umukino uratangira. Udukwavu two mu ikipe ya Twese n’utwo mu ikipe ya Kwezi twose **twiruka kibuno mpa amaguru** ngo dufate umupira. Kamwe kagatera hano akandi kagatera hariya.

Nyuma y’iminota mirongo itatu, nta kipe n’imwe yari yabashije gutsinda igitego. Zirakomeza zirakina, zirakinaaa! Ikipe imwe, yaba iri hafi gutsinda igitego, indi ikaba iyambuye umupira.



Bikweto, agakwavu ko mu ikipe ya Kwezi kari gafite umupira. Karacenga, Karacenga, karacengaaa, kegera izamu maze gashaka kuwuteramo. Nyamara, agakwavu kamwe ko mu ikipe ya Twese kabibonye kararakara. Kavana igikwasi mu ruhago rwako kugira ngo kakijombe Bikweto ku kuguru.

Agakwavu Matwi, kakoreshheje amatwi yako adasanzwe, kumva akantu gasakuza. Gakebutse kabona ni agakwavu ko mu kipe ya Twese karimo kavana igikwasi mu ruhago rwako. Ka Matwi gahita kabibwira Bikweto.



Ka Bikweto na ko gahita gatera umupira.
Gakubita intoki z'ako gakwavu, igikwasi kigwa
hasi, umupira ukomereza kwikaraga hejuru mu
kirere. Rutwe yitera hejuru, awukubitisha umutwe
no mu izamu ngo “Pa!”

Bidatinze umusifuzi Bihwahwa avuza ifirimbi ya
nyuma ngo “twiii!” Umukino urarangira, maze
udukwavu two mu ikipe ya Kwezi twegukana
insinzi dutyo.



Inyunguramagambo

- **inyundo:** igikoresha bakoresha mu bwubatsi cyangwa mu bubaji , bagikoresha bahonda cyangwa batera imisumari.
- **ruswa:** icyo umuntu atanga ngo bamuhe ibyo atari cyangwa kugura serivisi wari uftiyi uburenganzira.
- **ibikwasi:** udukwege dukunje bakoresha bafatanya imyenda cyangwa bihandura .
- **kwiruka kibuno mpa amaguru:** kwiruka cyane.


Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo, ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bakinnyi b'ingenzi mu ikipe ya Kwezi ?
2. Iyi nkuru irabera **he**?
3. Ikipe ya Twese yari ifite **uwuhe** mugambi?
4. **Kuki** abakinnyi b'ikipe ya Twese bari bafite umutima mubi?
5. **Ni gute** abakinnyi b'ikipe ya Kwezi begukanye intsinzi?

Gwera na Gafwana zabonye isomo



Yanditswe na L3 Initiative
Yashushanyijwe na Seif Bizimana



Insamagwe Gwera na Gafwana zavaga inda imwe. Zabanaga mu ishyamba rya Bigogwe n'izindi nsamagwe. Gwera na Gafwana zarakundanaga cyane, ariko zari zifite imyifatire itandukanye cyane.

Gwera, ari na rwo rwari urusamagwe rukuru, nta kintu na kimwe rwatinyaga. Rwakundaga kuzerera, rusura ahantu hatandukanye runitegerezza ibihabera byose. Ku mugoroba rwatahaga rwivuga **ibigwi** by'ibintu byose rwabaga rwakoze.



Gafwana ni rwo rusamagwe rwari ruto. Rwagwaga neza cyane. Rwababazwaga cyane n'ukuntu rukuru rwarwo Gwera rwishoraga mu byo rubonye byose. Nta ho izo nsamagwe zombi zari zihuriye pe! Urusamagwe Gafwana rwagiraga ubwoba bw'ibintu byose rukaba n'**ikigwari**.

Kubera iyo mpamu ntirwajyaga ruzerera na rimwe. Rwigerega mu rugo, ruhangayikishijwe n'ibishobora kuba kuri Gwera, kubera ubukubaganyi bwayo.



Hari igihe, urusamagwe Gafwana rwabonye rukuru rwarwo Gwera rutegwa n'igiti cya **madwedwe**. Rwahise ratera hejuru ruti “itonde Gwera, itonde amata yo muri iyo madwedwe ataza kukujya mu maso!”


Urusamagwe Gwera rwahise rubwira Gafwana ruti “humura rwose nta cyo mba.” Nuko urusamagwe Gafwana ruhita rusesera mu biti bya madwedwe byari aho hafi.



Ikindi gihe, urusamagwe Gafwana rwabonye rukuru rwarwo Gwera, rusesera mu migwegwe, rukurikiranye uruyuki rwarimo ruduhira, ruguruka ruva ku mugwegwe umwe rujya ku wundi.

Rwahise ratera hejuru ruti “itonde Gwera, itonde urwo ruyuki rutaza kukudwinga!” Rwongeraho ruti “dore n’imvura iragwa kandi urabona ko n’**ibifwera** byuzuye ahantu hose. Itonde rero hataza kugira ikikugwa mu mutwe!”

Urusamagwe Gwera rwahise rubwira Gafwana ruti “humura rwose nta cyo mba.” Nuko ruhita rukomeza gusesera mu migwegwe rukurikiye rwa ruyuki ndetse n’ibifwera byari biri kuri iyo migwegwe.



Nyuma yaho, urusamagwe Gafwana rwabonye Gwera ibatura urushinge urusamagwe Kadwidwi rwarimo rudodesha udufuka duto two kubikamo ibiceri. Rwahise ratera hejuru rutu “itonde Gwera, itonde urwo rushinge rutaza kukujomba!”

Urusamagwe Gwera rwahise rubwira Gafwana rutu “humura rwose nta cyo mba.” Nuko ruhita rukomeza rwegera Kadwidwi, rutegereje ko arangiza kudoda ngo ruhite rufata rwa rushinge.



Ku yindi nshuro, urusamagwe Gafwana
rwabonye rukuru rwarwo Gwera rurya imigwira.
Rwahise ruteru hejuru ruti “have Gwera, have
wikomeza kurya iyo **migwira** itaza kukugwa
nabi!”


Urusamagwe Gwera rwahise rubwira Gafwana
ruti “humura rwose nta cyo mba.” Nuko ruhita
rukomeza kwirira imigwira.

Haciyeho iminsi, urusamagwe Gafwana rwabonye rukuru rwarwo Gwera, rugenda rwomboka hejuru y'igitu cyari cyaguye hejuru y'ikizenga cy'amazi. Rwahise ratera hejuru rutu "itonde Gwera, itonde wukomeza kugenda hejuru y'icyo gitu, utaza kugwa muri ayo mazi!"

Urusamagwe Gwera rwahise rubwira Gafwana rutu "humura rwose nta cyo mba." Nuko ruhita rukomeza komboka rushinga amano kuri cya gitu.

Aho rero, ni ho byose byabereye! Mu kanya nk'ako guhumbya urusamagwe Gwera rwahise rwidumbura muri cya kizenga cy'amazi ngo "dumburi!" Ibyo byose urusamagwe Gafwana rwarimo rubyitegerezza.

Urusamagwe Gwera na rwo rwahise rutahwa n'ubwoba, maze rutangira guhamagara rwene nyina rutu "ndarohamye Gafwana we! ndarohamye banguka untabare!" Uko rwariraga ruhamagara rwene nyina ni na ko rwagendaga rwibira mu mazi buhoro buhoro.



Urusamagwe Gafwana rwagize ubwoba ku buryo rwatangiye no gutitira. Rwarimo rwibaza ruti “ye...we! U...bu se ko...ko ndabigira nte? Ubu ndabigira nte koko! oya weee!”

Urusamagwe Gafwana rwagumye muri ibyooo, ku bw'amahirwe rubona ikigufwa kinini cyarerembaga ku nkcombe z'amazi mu kizenga. Rwahise rufata cya kigufwa n'amajanja yarwo, maze ruhita rutarukira kuri cya giti cyari cyaguye mu mazi. Rwahamagaye Gwera ruti “Gwera banguka, fata indi mpera y'iki kigufwa vuba vuba.”

Urusamagwe Gwera rwahise rwihutira gufata indi mpera ya cya kigufwa Gafwana ihita ijugunya ku nkcombe y'**ikizenga**.



Bumaze kwira, inyamaswa zose za Bigogwe zakoraniye hamwe zumva uko urusamagwe Gwera ruvuga ibigwi bya Gafwana n'uburyo rwarukijije.

Inyamaswa zose zimaze gutega amatwi, zabonye ko izo nsamagwe zombi zabonye isomo rikomeye!

Urusamagwe Gwera rwamenye ko atari byiza **guhubuka** naho urusamagwe Gafwana rumenya ko mu buzima hari igihe biba ngombwa gutinyuka, ugashira ubwoba.



Inyunguramagambo

- **Insamagwe:** nyamaswa z'ishyamba zijya gusa n'ingwe no gukara nka zo.
- **ibigwi:** ibikorwa by'ubutwari.
- **ikigwari:** udakora ibikorwa by'ubutwari.
- **madwedwe:** igiti cyo mu ishyamba kigira amakakama asa nk'amata.
- **ibifwera:** udu simba tumeze nk'iminyorogoto dukunda kuba ahatose cyangwa ku mababi y'ibyatsi bitohagiye.
- **imigwira:** imineke y'igitoki cyaguye kidakomeye mu gihe cy'umuyaga maze kikanekera mu rutoki.
- **ikizenga:** amazi menshi ariko mabi aretse ahantu by'igihe gito kubera imvura nyinshi.


Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo, ujye ubasaba kuzamura urutoki rumwe rumwe, bakubwire igisubizo.

1. **Ni izihe** nyamaswa zivugwa mu nkuru?
2. **Ni hehe** insamagwe Gafwana na Gwera zabaga?
3. **Ni iki** cyabaye ku rusamagwe Gwera?
4. **Kubera iki** ibyo byabaye ku rusamagwe Gwera?
5. **Ni gute** urusamagwe Gafwana rwakijje Gwera?

Majujyuri na Kajunguri



Yanditswe na L3 Initiative
Yashushanyijwe na Rupert Bazambanza

Inyoni ebyiri Majuyjuri na Kajunguri zituye mu majyaruguru. Izo nyoni ziva inda imwe. Majuyjuri ni yo nyoni nkuru. Ni inyamatsiko kandi ikunda kuvumbura ibintu bishya. Kajunguri inyoni ntoya yo, ni inyabwoba, kandi ikunda gukurikira mukuru wayo.

Umunsi umwe, Majuyjuri yaravuze iti “mfite inzara! Reka ngende kwirira ku masaka y’umuhinzi Kajyibwami.”



Kajyunguri, ya nyoni y'inyabwoba ibyumvise, ikanura amaso ishya ubwoba. Ireba mukuru wayo maze iravuga iti “u...u..u.! Umurima w'umuhinzi Kajyibwami?” A...a...a..! Ariko se umukobwa we Majyambere twamukizwa n'iki ko ubushize yari agiye kudufata?

Majyujyuri iravuga iti “wigira ubwoba, ngwino tugende, ndisonzeye, humura ndakwerekwa uko tubigenza.”



Kajunguri, ntabwo yashakaga kugenda.
Ntiyashakaga no gusigara yonyine, kandi na yo
yari ishonje.
Nuko izo nyoni zombi ziraguruka, Majuyjuri
iguruka mbere, Kajunguri iguruka iyikurikiye.

Zigeze hejuru y'inzu y'umuhinzi Kajyibwami, inyon
Kajunguri yitegerezza iburyo, irongera yitegerezza
ibumoso. Yitegerezza iruhande rw'inzu hose.
Irvuga iti "mbega byizaa! Nta kibazo gihari,
Majyambere ntabwo ahari."

Nuko zirakomeza ziraguruka, zerekeza mu
mubande. Zageze hafi y'umurima w'amaska
wa Kajyibwami, Kajunguri ikanura amaso maze
irongera ishya ubwoba.



Nuko ivuga mu kajwi gato gatitira iti “Majuyuju,
reba! Reba! Ni Majyambere umukobwa wa
Kajyibwami! Ka..ka..kandi...araza hano!”

Majuyjuri irakebuka , iritegerezza ibona ni
Serukiranyi. Iravuga iti “oya”. Ntabwo ari
Majyambere, ahubwo ni ka gacucu Serukiranyi.

Majuyjuri na yo itangira gushidikanya.
Yitegerezza serukiranyi. Ikajya ibona akaboko
ke kamwe kazamuka hejuru, mu kandi kanya,
ikabona akandi kaboko na ko karazamutse!





Nuko Kajyunguri ishya uwoba,
iradagadwa maze yihisha inyuma ya
murumuna wayo Majuyuyuri. Ihengereje
inyuma yayo, ibona utuboko tubiri twa
serukiranyi turimo tuzamuka hejuru. Nuko
irajwigira iti “yebeba we! Ni Majyambere
pe! Reba, arimo kuzamura amaboko ngo
adutere amabuye!”



Majuyjuri na yo ibibonye iravuga iti
“yewewe! Ni Majyambere koko! Reka tuve
aha vuba vuba!” Nuko ziraguruka n’inzara
yose. Zigenda zivuga ziti “tugize amahirwe,
Majyambere ntadufashe.”

Za nyoni ebyiri zigurukana umuvuduko mwinshi. Ntizigeze zibona agakobwa gato kari kicaye munsi y'igitu karimo guseka. Karavuga kati “aha! Amayeri yanje yazikanze! Ntizizongera kugaruka **kona** amasaka yacu. Si ngobwa kandi ko nkomeza kurinda aya masaka buri munsi.”



Inyunguramagambo

- **kona:** konona imyaka iri mu murima kw'amatungo cyangwa kw'inyoni n'izindi nyamaswa zo mu gasozi.
- **Serukiranyi:** kadahumeka/ igipupe gikoze mu bishara n'ibirere bahambiranya bakagiha ishusho y'umuntu hanyuma bakagishyira mu mirima kugirango inyoni nizikibona zikeke ko ari umuntu zoye kona imyaka .
- **kudagadwa:** kugira ubwoba bwinshi bigatuma utitira.


Ibibazo 5 by'ingenzi



Icyitonderwa: Reba ko abana bumvise inkuru neza, ububaza ibibazo 5 by'ingenzi. Uko ubabajije ikibazo, ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa muri iyi nkuru?
2. **Ni hehe** Majuyjuri na Kajyunguri bagiye?
3. Bari bagiye gukora **iki**?
4. Byabagendekeye **gute** bagezeyo?
5. Inkuru yarangiye **gute**?

Imvubu Myasiro



Yanditswe na L3 Initiative
Yashushanyijwe na Jean de Dieu Munyurangabo



Kera habayeho, imvubu ikitwa Myasiro.

Myasiro yiberaga mu kibaya mu ikamyo ishaje.
Yabanaga na nyina hamwe na barumuna bayo
Myuko na Myambi. Nyina yahoraga yifuza kubona
abana bayo bafite **uburanga**, nta myanda,
nta **mvuvu** bafite ku mubiri.

Nyina w'izo mvubu yari afite ikibazo kimwe gusa.
Myasiro, imvubu ntoya muri zo, ntiyakundaga
koga. Zene nyina zakundaga koga mu ruzi rwari
hafi aho. Myasiro yo yakundaga kwiyicarira mu
gicucu cy'ibiti by'imyumbati, ikisomera inkuru.

Nyina w'izo mvubu, yahoraga yibaza impamu
Myasiro yanga koga bikayiyobera. Umunsi umwe,
yasenze Myasiro aho yari yicaye isoma, irayibwira
iti "ugomba koga. Urasa nabi kandi uranuka!
Reba ayo matwi yawe yuzuye imyanda, urebe
n'iyo myate yuzuye ku birenge byawe."



Nuko Myasiro yubura umutwe mu gitabo, isubiza nyina iti "**winsebya** mama. Yego sindi mwiza ariko ndi umusomyi mwiza."

Nyina yumvise ibyo Myasiro ivuze birayitangaza cyane. Nyina irasubiza iti "umusomyi! Ibyo nta bwenge burimo! Uzabona umugabo gute se kandi ufite umwanda ?" Ni byo koko, imvubu Myasiro yaranukaga kubera umwanda.

Nyina wa Myasiro yakoze uko ishoboye kose
kugira ngo Myasiro ikarabe, ariko biranga.

Umunsi umwe, nyina wa Myasiro yohereje
abavomyi kuvoma amazi. Bavuyeyo, bategura
amazi y'akazuyazi meza mu rwiyuhamagiriro.
Nyamara imvubu Myasiro yanga kujya gukaraba.
Nyina irongera iyigurira imvange y'ammasabune
ahumura yo gukaraba, ariko biba iby'ubusa,
Myasiro ikomeza kwanga gukaraba.



Nyuma yaho, nyina yumvise kuri radiyo itangazo ritumira inyamaswa mu myiyereko y'ubwiza . Ibyumvise, yiruka vuba, ijya kubimenesha abana bayo. Myuko, Myambi na Myasiro zibyumvise zirishima, zitangira kwitegurira iyo **myiyereko**.

Myuko ishaka imyenda myiza yo kwambara, yisiga imvange y'amavuta meza. Myambi yitoza kubyina, Myasiro yo yitoza gusoma inkuru iranguruye ijwi.


Umunsi w'imiyereko ugeze Myuko yerekanye ingendo nziza n'uburanga bwayo. Ika jya izunguza **amayunguyungu**, ikajya ihindura ingendo, ikagendagenda imbere y'izindi nyamaswa.



Myambi yerekana imbyino idasanzwe.

Nuko igihe cya Myasiro kigeze ihagarara imbere y'inyamaswa zaje kureba imiyiyereko. Yari ifite mu biganza igitabo cy'inkuru. Zibonye uko isa nabi kandi inuka zikubita ibitwenge, izindi zipfuka amazuru, habe no kumva ibyo yarimo isoma.

Hashize akanya, ibicu birakorakorana, imvura itangira kugwa. Za nyamaswa zica amababi y'imyumbati ziritwikira izindi zugama munsi y'**ibyima** by'**abavumvu**. Myasiro yo, ikomeza kwisomera inkuru mu ijwi riranguruye, mu mvugo nziza.



Imvura imaze guhita, inyamaswa zose zisubira mu myanya yazo. Nuko zose zitangira gutega amatwi ijwi ryiza zumvaga. Iryo jwi ryari irya nde? Ryari irya Myasiro umusomyi wari urimo asoma inkuru.

Imvura yari yakesheje umubiri wayo wose kandi



umunuko wayo wari washize. Inyamaswa zitangazwa no kumva Myasiro isoma mu mvugo nziza cyane. Zikibaza ziti “iriya se koko ni Myasiro? Irasa neza! Irasoma neza!” Inyamaswa zose zateze amatwi, zirabyumva, zirishima, ziraseka, zirasakuza cyane, zivuza **imyirongi**, ziyikomera amashyi.



Nyina wa Myasiro ibibonye irishima cyane. Nuko imiyerekko irangiye, nyina wa Myasiro irayisanga, irayihobera. Irayibwira ati “uranshimishiye Myasiro mwana wanjye. Mbonye ko uri umuhanga cyane, kandi uruta kure **nyampinga** mu bwiza. Uri umusomyi mwiza pe!”

Nuko imvuba Myasiro na yo ibwira nyina iti “ni byo, mama, ibyo wambwiraga ni byo. Inyamaswa zose zanteze amatwi igihe nari maze koga kandi ntakinuka!”

Irakomeza iravuga iti “iyo nkomeza kugira umunuko, ntabwo zari kumva imvugo yanje nziza. Zari gukomeza **kumveba** maze ntizinyumve. None kuva ubu ngiye gukomeza gukaraba neza, maze ndusheho kuba umusomyi mwiza.”



Inyunguramagambo

- **uburanga:** ubwiza bwo ku mubiri.
- **imvuvu:** utuntu duhunguka ku mubiri bitewe n'uko hajeho umwanda ukabije.
- **gusebya:** kuvuga ikintu cyangwa umuntu nabi uko bitari .
- **imiyerekko:** imitambagiro yo kwigaragaza mu birori cyangwa mu marushanwa.
- **amayunguyungu:** igice cy'umubiri cyegereye urukenyerero.
- **ibyima:** imitiba cyangwa imizinga y'inzuki.
- **abavumvu:** aborozi b'inzuki .
- **imwirongi:** igikoresho cy'umuziki gifite imyenge, bakakivuza bahuhamo bigatanga ijwi ryirangira ku buryo buryoheye amatwi.
- **nyampinga:** umukobwa warushije abandi mu marushanwa y'ubwiza.
- **kuveba:** kugaya.

Ibibazo 5 by'ingenzi




Icyitonderwa: Reba ko abana bumvise inkuru neza, ububaza ibibazo 5 by'ingenzi. Uko ubabajije ikibazo, ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa muri iyi nkuru?
2. **Ni he** iyi nkuru yabereye?
3. **Kuki** Myasiro yahoraga isa nabi?
4. **Ni ibihe** birori Myasiro, Myuko na Myambi bitabiriye?
5. **Ni gute** yabashije gutsinda?

Igihembe cya 2



Utugurube dutatu



Yafatiwe ku mugani muremure w'icyongereza
"Three little pigs" wahimbwe na John Scieszka
na Lane Smith Yashushanyijwe na Seif Bizimana



Kera habayeho utugurube dutatu tukibera mu ishyamba.

Akagurube ka mbere kitwaga Nifi Nifi, aka kabiri kikitwa Nufu Nufu, naho aka gatatu kikitwa Nafa Nafa.



Umunsi umwe, imvura yaraguye, umuyaga ukajya uhuha uti “wuuu! Wuuu!” Nuko twa tugurube dutatu turakonja cyane, twigira inama yo kujya kugama mu **rutare** rwari hafi aho.

Tugeze muri rwa rutare, dushaka kwinjizamo imitwe, ariko dusangamo ikirura gisinziriye, **kigona** kitii “zzz.” Tugikubise amaso tugira ubwoba, duhindu umushyitsi, dutekereza ko gishobora kubyuka kikaza kuturya.




Twiruka kibuno mpamaguru. Tari, tari, tari, tari...
tugenda dushaka aho kwihisha. Tugeze kure
y'urwo rutare, utugurube dutatu, turicara
kugira ngo turuhuke, tukajya duhumeka
twahagira.


Akagurube gakuru muri two Nafa Nafa
karekeraho kwahagira, karavuga kati “ntabwo
twakomeza kuba ahantu harangaye gutya
muri iri shyamba. Reka twese twubake inzu
izajya iturinda imvura, umuyaga n'izindi
nyamaswa zishaka kuturya nk'ikirura.”



Nuko akagurube Nifi Nifi k'akanebwe muri
twose gatega amatwi. Karavuga kati "icyo
gitekerezo ni cyiza! Tugomba kwirinda ikirura.
Ngiye kubaka inzu y'ibyatsi. Ngiye kwikorera
umutwaro w'ibyatsi byumye kuko byoroshye
kuboneka. Nshobora kwiyubakira inzu mu
munsi umwe gusa, hanyuma nkiryamira
nkaruhuka."



Nufu Nufu yo yakundaga gukora ariko
ntiyigore cyane. Iravuga iti “jye ngiye kubaka
inzu y'ibiti. Ngiye kwikorera imitwaro y'ibiti. Ibiti
biboneka hose, kandi kubyikorera ntibiremera.
Sinshaka rero kwivuna.”



Nafa Nafa, ni yo yari nkuru muri zose,
kandi ni yo yari izi ubwenge. Iti “nnyewe
ndubakisha amabuye. Ndabizi amabuye
aragoye kuyabona, aranaremera kuyikorera
kandi bizafata igihe kinini, ariko ibyo nta cyo
bitwaye kuko inzu izaba ikomeye.”

Utugurube Nifi Nifi na Nufu Nufu dusubiza
Nafa Nafa tuyikwena tuti “ibyo birakureba.”
Nuko twa tugurube twose tujya kubaka inzu
zatwo. Zirangiye buri kagurube gataha mu nzu
yako.

Cya kirura kiza kumara iminsi myinshi gisinziriye, maze aho gikangukiye cyumva kirashonje cyane.

Amara yacyo akagonga ati “ruuuuuu!” Ikirura kirahuma kiti “huuu, huuu, huuu!” Cyigira inama yo kujya gushaka icyo kurya.

Nuko gihubuka muri rwa rutare cyabagamo, kirara muri rya shyamba, hashize akanya, gitangira gutega ugutwi no kureba hirya no hino maze **kirabukwa** Nifi Nifi yinjira mu kazu kayo k’ibyatsi. Kirahuma kiti “huuu, huuu!” Gikubita igitwenge kiti “kwekwekweee! kwekweekweee! Akagurube gato! Ibiryo birtyoshye by’uyu munsi byabonetse.”

Ikirura kihageze kirakomanga. Akagurube Nifi Nifi gashigukira hejuru kavuye mu bitotsi, gahengeza mu mwenge w’urugi kabona umutwe wa cya kirura. Kagira ubwoba bwinshi maze cyigira inama yo kwanga gukingura urugi. Nuko ikirura kikajya kivuga mu kajwi gatuje, gatuje cyane kiti “wa kagurube we, wa kagurube we, nkingurira.” Ka kagurube karasubiza kati “oya, oya, singukingurira. Uri ikirura gishaje cy’ikigome, singukingurira.”

Nuko, Ikirura kigira inyuma kigarukana imbaraga nyinshi maze gihuha ka kazu kiti “pfuuu, pfuuu!” Muri ako kanya akazu ka Nifi Nifi karatumuka ngo pfaaa! Nifi Nifi ibaduka yiruka, ijya gucumbika mu nzu y’ibiti kwa Nufu Nufu.



Cya kirura cyiruka kigana kwa Nufu Nufu.
Kigezeyo, kibona akagurube ka kabiri.
Kirishima, kitii “mbega byizaaaa! Noneho
ndarya utugurube tubiri twose!” Ikirura
kihageze gisunika urugi gisanga **ruradadiye**.
Nuko kikajya kivuga mu kajwi gatujeee, gatuje
cyane kitii “mwa tugurube mwe, mwa tugurube
mwe, mukingure.”

Ariko twa tugurube turasubiza tuti “oya, oya,
ntitugukingurira. Uri ikirura gishaje cy’ikigome,
ntitugukingurira.” Nuko ikirura cyigira inyuma
kigarukana imbaraga nyinshi maze gihuha ka
kazu ngo “pfuuu, pfuuu!”

Muri ako kanya ka kazu ka Nufu Nufu no
hasi ngo baaaaa! Nuko Nifi Nifi na Nufu Nufu
zibaduka ziruka zijya gucumbika mu nzu
y’amabuye kwa Nafa Nafa.



Cya kirura kibibonye gityo, gikomeza kwirukankana twa tugurube tubiri kigana kwa Nafa Nafa ariko tugitangayo.

Kibona akagurube ka gatatu gakingurira twa tugurube tubiri, kirishima cyane kiti “mbega byizaaaa! Noneho ndarya utugurube dutatu twose!” Gitangira gukomanga.

Ikirura gisunika urugi gisanga rudadiye. Nuko kikajya kivuga mu kajwi, gatuje cyane kiti “mwa tugurube mwe, mwa tugurube mwe, mukingure.” Ariko twa tugurube turasubiza tuti “oya, oya, ntitugukingurira.” Uri ikirura gishaje cy’ikigome, ntitugukingurira.” Nuko ikirura cyigira inyuma, kigarukana ibakwe maze gihuha ka kazu ngo “pfuuu! Pfuuu!” Ariko noneho inzu ntiyagwa, kirongera kiti “pfuuu, pfuuu!” Inzu ya Nafa Nafa ntiyigera inyeganyega.

Ikirura kirongera gihuha imbaraga nyinshi kiti “pfuuuu, pfuuu, pfuuu.” Cya kirura cyari cyananiwe cyane gihera umwuka, **cyidimba hasi** ngo “vutuuuuu!” Nuko kirambarara hasi.



Utugurube dutatu duhengereje mu mwenge
w'urugi, tubona cya kirura kirambaraye hasi.
Turagikwena, turaseka turatembagara!
Turishima kuko dukijijwe n'inzu yatwo ikomeye.

Ikirura byakigendekeye gute? Kuva ubwo,
ikirura kiribwira kit "n'ubundi inyama
y'akagurube irabishye, sinzongera kuyirya."



Inyunguramagambo

- **urutare:** ibuye rinini cyane.
- **kugona:** gusinzira ugahumeka ufurura ku buryo abantu babyumva .
- **kurabukwa:** kubona ikintu wihuta cyangwa kinyaruka vuba ariko kikaguca mu maso ntiwongere kukibona .
- **ruradadiye:** rurakinze cyane .
- **cyidimba hasi:** cyikubita hasi .
- **turagikwena:** turagiseka tunakimwaza.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa mu nkuru?
2. **Ni hehe** ikirura cyari kiri igihe utugurube twakibonaga bwa mbere?
3. **Kuki** utugurube dutatu Nifi Nifi, Nafa Nafa na Nufu Nufu twiyemeje kwiyubakira inzu buri kose?
4. **Ni iki** cyabaye igihe ikirura cyabyukaga aho cyari kiryamye?
5. Ikirura cyifashe **gute** kimaze kubura utugurube two kurya?


Ubutwari bwa Nyiramapyisi



Yanditswe na L3 Initiative
Yashushanyijwe na Seif Bizimana

Habayeho agapyisi gato , kikitwa Nyiramapysi. Mu ishuri, ako gapyisi kiganaga n'**umusambi** witwaga Gapwapwa, inkende yitwaga Kanwiri na Twiga yitwaga Pyatu. Nyiramapysi yari ifite ikibazo cy'uko izo nyamaswa zindi zayisekaga, zikayikwena ngo ifite isura mbi.

Umunsi umwe, zari zigiye ku ishuri, Gapwapwa ibwira Nyiramapysi iti “ufite umubiri mubi cyane!” Nuko Kanwiri yungamo iti “ufite ibitwi binini kandi bobi cyane!” Pyatu imaze kumva ibyo, na yo yongeraho n’ubwirasi bwinshi, iteretse amaso iti “ni byo pe! Ubwanwa bwawe ni bobi cyane, dore ntibunasokoje.”



Ishuri

Ibyo Nyiramapysi byarayibabazaga cyane.
Byageze ndetse n'aho itangira kwishyiramo ko
ibyo izo nyamaswa zaybwiraga ari byo. Nuko
ikajya yibwira iti “ni jye mpyisi mbi kurusha izindi
zose zibaho koko.”

Nta nyamaswa n'imwe mu zo biganaga
yashakaga kuba incuti na yo kuko zose zari
zifite ubwoba bwa Gapwapwa, Kanwiri na
Pyatu zayangaga. Zibwiraga ko ziramutse
zibaye incuti na Nyiramapysi, na zo zagira
ikibazo cyo guhabwa akato. Nyiramapysi ibyo
byarayibabazaga cyane. Yahoraga ifite irungu
kandi ibabaye cyane.



Ishuri

Igihe kimwe, Nyiramapyisi yari iri mu rugo yonyine, nuko yigira inama yo gushaka icyo yakora kugira ngo Gapwapwa, Pyatu na Kanwiri zitazongera **kuyinnyega**. Se yari yagiye guhinga, nyina yagiye ku isoko. Nuko ibona umwanya wo gukora ibyo ishaka byose.

Yafashe isabune n'amazi maze itangira kwipyipyinyura. **Yaripyipyinyuye** irongera iripyipyinyura ariko ntihagira igihinduka ku mubiri wayo. Ibyo bimaze kwanga, yiyemeje gusuka inweri mu bwanwa bwo ku munwa no ku kananwa. Nyiramapyisi yirebye mu ndororwamo yishimira cyane isura yayo nshyashya.

Nyamara, amatwi ya Nyiramapyisi n'ubundi yakomeje kuba manini. Yahise ifata akagozi, amatwi iyahambirira inyuma ku buryo atongeye kurereta. Nuko yongera kwireba mu ndorerwamo, iratangara cyane iti “mbega byiza! Ntabwo isura yanje ikiri mbi na mba!”

Muri ako kanya, Nyiramapyisi yiyemeza guhindura ibintu byinshi ku miterere yayo. Yiyemeje guhindura ingendo, itangira kugenda nk'umusambi Gapwapwa. Yiyemeza guhindura ijwi itangira kuvuga akajwi ko hejuru nk'ak'inkende Kanwiri. Yaniyemeje gutangira gutereka amaso nka Twiga Pyatu. Yashakaga kwihindura nka zo neza neza. Nyuma y'igihe kinini yitoza, yumva irananiwe maze itangira **guhondobera**.



Mu gihe yari isinziriye, yararose. Muri izo nzozi, yabonaga iri ku ishuri, izindi nyamaswa ziyibwira uburyo ari nziza. Gapwapwa yayibwiye ko ifite umubiri n'ubwoya bwiza, Kanwiri yayibwiye ko ifite inweri nziza ku munwa no ku kananwa, naho Pyatu iyisaba ko byaba incuti. Nyiramapyisi ibyo byarayishimishije cyane.

Mu nzozi, yagiye kubona ibona za nyamaswa zindi zirimo zikina, nuko ishaka kuzisanga ngo zikine. Igiye kumva yumva hari ikintu kiyikoze ku rutugu, yumva ijwi riyihamagara. Iryo jwi ryari irya nde? Ryari irya nyina ryayihamagaraga riti “kanguka mwana wa!”

Nuko Nyiramapyisi ihita ikanguka, inzozi zirangirira aho. Ugutwi kwayo kumwe kwari kongeye kurereta, ubwoya bwayo bwari bwongeye guhagarara, n'inweri zari zisutse mu bwanwa bwo ku munwa wayo zari zatangiye guhambuka.

Nyina yarayirebye irumiwa iti “mwana wanjye koko ubwo ibyo ni ibiki wakoze!” Nyiramapyisi ariko ntiyashakaga kubwira nyina impamu yisutse inweri mu bwanwa, igahambirira amatwi yayo inyuma, ikanapyipyinyura umubiri wayo. Ako kanya, yahise itangira kurira. Nuko nyina irayibwira iti “humura mwana wanjye icecekere, ndagufasha.”

Nuko iherako, ifasha Nyiramapyisi guhambura izo nweri, guhambura neza amatwi yayo, no gusokoza ubwoya bwayo. Icyo gihe nyina yayibwiye ikintu gikomeye ku buryo Nyiramapyisi itigeze icyibagirwa. Yarayibwiye iti “mwana wa, ibigaragara inyuma nta gaciro bifite.” Yongeraho iti “ibifite agaciro ni ibyo twifitemo imbere mu mutima. Uramutse weretse buri wese ko uri umugwaneza n'umunyabwenge, ukubaha buri wese, nta wutagukunda cyangwa ngo akubahe.”



Nyiramapyisi ibyo yabitekerejeho cyane. Nuko bukeye yiye meza kureba niba koko ibyo nyina yari yayibwiye ari byo. Yagiye ku ishuri, igezeyo itangira gusu huza buri wese n'urugwiro rwinshi. Amasomo arangiye, Gapwapwa, Kanweri na Pyatu zatangiye kuyinnyega nk'uko bisanzwe, ariko Nyiramapyisi yo yikomereza urugendo, ndetse izereka ko ibyo zivuga itanabyitayeho.

Izindi nyamaswa ziganaga, zibonye ko Nyiramapyisi ititaye ku byo zayibwiraga, zirumirwa. Nyuma y'igihe gito, Gapwapwa, Kanweri na Pyatu zari zimaze gucika kuri uwo muco mubi wo kunnyega Nyiramapyisi.

Icyo gihe, aho kubona Nyiramapyisi nk'impysi ifite umwanda n'ibyanwa bibi, zari zisigaye ziyibona nk'impysi izi ubwenge kandi yubaha buri wese. Kuva ubwo, buri nyamswa yose yashakaga kuba incuti na Nyiramapyisi. Nyiramapyisi, Gapwapwa, Kanweri na Pyatu, zose zahakuye inyigisho ikomeye, nuko zose zihindura imyifatire.



Inyunguramagambo

- **umusambi:** inyonu nini irangwa no kugira ijosi n'amaguru birerire n'isunzu rinini ku mutwe.
- **kunnyega:** guseka umuntu ariko umugaya ukanamukoba .
- **kwipyipyinyura:** kwikuba cyane ku mubiri ugira ngo imyanda iveho.
- **guhondobera:** gusinzira buhoro buhoro.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa mu nkuru?
2. **Kubera iki** Nyiramapyisi yahoraga ibabayé kandi yigunze?
3. **Ni iki** Nyiramapyisi yiyemeje gukora kugira ngo igire incuti?
4. **Ni hehe** Nyiramapyisi yari iri mu gihe yiyemezaga guhindura isura yayo?
5. **Ni gute** Nyiramapyisi yaje kugera ku ntego yayo kugira incuti nyinshi?

Rwagakoco




Yanditswe na L3 Initiative
Yashushanyijwe na Seif Bizimana

Kera habayeho imbeba eshatu, Rwezamenyo,
Binwete na Semerwe. Izo mbeba zaravukanaga.
Zabanaga mu mwobo munini wo mu ishyamba
rigari rya Manyinya.

Igihe kimwe, izuba ryaracanye, imvura irabura,
amapfa aratera, ibimera byose biruma, ibiribwa
birabura. Nuko za mbeba zibura icyo zirya,
zirasonza, zirasonza weee!


Nyina w'izo mbeba ishakisha ibiribwa hafi aho,
ariko iraheba. Ihitamo gufata urugendo rurerure,
ijya gushakisha aho yakura ibiribwa. Irashakisha,
irashakisha, ishakisha hirya no hino ibiribwa
by'utwana twayo.

Hashize iminsi itarahindukira, za mbeba zigira
inzara kandi zikumbura nyina, zikajya zirirwa zirira,
zinwigira cyane ziti “nwiii! Nwiii! Nwiii!”





Rwezamenyo igira igitekerezo, maze ibwira zene nyina iti “reka mbabwire! Reka tujye muri ruriya rugo rw’umuhinzi dushake icyo kurya. Dushobora kubona amasaka, ibishyimbo, amamininwa, amashaza cyangwa ikimuri! Nkunda ikimuri weee!”



Semerwe irazongorera iti “umuhinzi n’umugore we barasiniziriye, reka twinjire vuba mu gikoni.”


Nuko ziranyonyomba zijya mu gikoni zitangira gushaka ibiribwa. Zishakira munsi y’intebe **ziraheba**. Zishakira mu nkono ziraheba.

Rwezamenyo igiye kubona, ibona urweso rw’ikimuri ku meza. Igira amerwe, itangira kwihumuriza ari na ko inwigira iti “huuu! Nwii! Nwiii, Nwiii! HUUU!”



Rwezamenyo iranwigira iti “yooo! Ikimuri!
Ndashonje! Reka twirire iki kimuri.”


Rwezamenyo iritunatuna yitegura gusimbukira
ku meza. Binwete na Semerwe zirasakuza ziti
“oya! Reka twitonde. Ubu se haramutse hari
rwagakoco?”



Rwezamenyo ihagarara akanya gato, iriyumvira kuko itashakaga kugwa mu **mutego**.

Kwihanganira inzara birayinanira, isimbukira kuri rwa rweso ngo Pwa! Itamira ikimuri kiryoshye, yuzuza amatama, irarya, iraryaaa!

Ikebuka aho yasize Binwete na Semerwe irazihamagara iti “Binwete weee, Semerwe weee, mwigira ubwoba, hano nta rwagakoco ihari, nimuze turye!”




Impumuro nziza y'ikimuri ikwira mu cyumba.
Binwete na Semerwe zirihumuriza, zirongera
zirihumuriza. Impumuro nziza y'ikimuri irazikurura
maze zisimbukira ku meza, zigwa muri rwa rweso
rw'ikimuri ngo “pa!”

Za mbeba zose zitangira kuryana umururumba.
Zikajya zizamura utuzuru zikihumuriza ari na ko
zinwigira ziti “huuu! Nwiii! Nwiii! Nwiii! Huum!”




Za mbeba zimaze kwijuta, zisohoka muri rwa rweso zitangira kubyina, ziraririmba zitangira gukinira muzunga ku meza, ntizabona aho rwagakoco yari iri.



Zirazungazunga, zirazungazunga no muri
rwagakoco ngo pa!

Rwagakoco izifata imirizo ngo “koco!” Zigerageza
kuyivamo ariko bigeze aho zirananiro,
ziranwigira, ziranwigira ziti “nwiii! nwiiii! nwiii!”
Zirarira cyane, nuko urusaku rwinshi rukangura ba
nyir’urugo.



Umuhinzi n'umugore we **bahengereza** mu gikoni, babona za mbeba eshatu zirira ziti “nwi! Nwi! Nwi!” Umugore abona rwa rweso rw’ikimuri rurimo ubusa! Aravuga ati “yoooo! Utu tubeba twagize inzara! Hashize iminsi izuba ryarakaze, ibiribwa byarabuze iwabo mu ishyamba!” Umugabo we ati “Ibyo ni byo, ariko ntabwo zigomba kundira ikimuri!” Nuko akingura urugi, afata rwagakoco ayijugunya hanze.



Imbeba eshatu, Semerwe, Rwezamenyo na
Binwete zibona zirimo ziguruka mu kirere, zigenda
zinagana muri rwagakoco.

Mu gihe zari zitangiye kumva umunyenga
rwagakoco igwa hasi irafunguka ngo “pa!”
Imbeba zivamo **ziravuduka**.

Ziravuduka, ziravudukaaa, zihumeka zigeze mu
rugo!



Zigeze mu rugo zibona nyina yateguye ibiryo byinshi ku meza. Iravuga iti “bana ba, nabaguriye ikintu cyizaaaa. Ikimuri!”

Zirarebana, maze zizunguza udutwe ziraboroga cyane ziti “oya mama weee! Duhe ikindi kintu icyo ari cyo cyose ariko kitari ikimuri.”

Inyunguramagambo

- **amapfa:** inzara iterwa n'uko izuba ryavuye cyane.
- **ziraheba:** zisanga ntakirimo.
- **rwagakoco:** umutego ufata imbeba ukozwe n'imikwege ifite rasoro.
- **umutego:** ikintu cyagenewe gufata utunyamaswa twonera abantu.
- **guhengereza:** kurebera mu kenge gato.
- **kuvuduka:** kwiruka cyane.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Buri gihe uko ubabajije ikibazo ujye ubasaba kuzamura urutoki rumwe, bakubwire igisubizo.

1. **Ni ba nde** bavugwa mu nkuru?
2. **Ni hehe** utubeba twabonye icyo kurya?
3. **Kuki** Rwezamenyo yabanje kugira ubwoba mbere yo gufata ikimuri?
4. Byaje kugenda **gute** mu nkuru?
5. **Ni gute** utubeba dutatu twabashije kuva muri rwagakoco?

Abana ba Twiga bararwaye



Yanditswe na L3 Initiative
Yashushanyijwe na Dolph Banza



Igihe kimwe, Twiga yarwaje abana. Bagahora bakorora, bagahora bitsamura, bagahora bipfunisha **imiswari** yabo.

Nuko Twiga igahora yibaza iti “kuki abana banje bahora barwaye? Ubu se bazakizwa n’iki?”

Twiga yarizwaga n’uko abana bayo bararaga barira ijoro ryose, ibitonyanga by’amarira bikajya bitonyanga mu miswari yayo.



Bigeze aho, Twiga **iriheba**, kuko yumvaga yarabuze icyayivurira abana. Nuko iza kwigira inama yo kujya muri pariki y' Akagera, **kugisha inama** inzovu Mutware.


Iragenda, igezeyo, isanga Mutware n'abana bayo barakora isuku ikomeye.

Ako kanya, Mutware itangira kubwira abana bayo iti “bana ba, ibikoresho byose bigomba kozwa, imyenda yose ikameswa, ibisaswa byose bigasukurwa. Ntimwibagirwe gukaraba neza. Buri gikoresho cyose kiri aha kigomba kugirirwa isuku.”

Iratangara iti “Mutware we, buri kintu cyose kiri aha gifite isuku! Abana bawe bameze neza, bafite isuku, bafite ubuzima bwiza.”

Irukomeza iravuga iti “abana banje bo, bahora barwaye. Wamenya impamvu bahora barwaye? Ntiwambwira impamvu koko?”

Inzovu Mutware ireba Twiga. Nuko ibona Twiga irasa nabi, ifite umwanda mwinshi ariko ntiyagira icyo ibivugaho , iricecekera. Hanyuma iravuga iti “birababaje! Jye, abana banje ntibajya barwara. Nta cyo nagufasha rero.” Twiga imaze kumva ayo magambo, ikomeza urugendo.



Iragenda, igeria ku **mugina** w'imišwa. Ibona umuswa wari urimo wikuburira inzu yawo. Hashize akanya, wa muswa uhamagara abana bawo.

Urababwira uti “bana ba, ibikoresho byose bigomba kozwa. Imyenda yose igomba kumeswa, ibisawa byose bigasukurwa. Ntimwibagirwe gukaraba neza. Buri gikoresho cyose kiri aha, kigomba kugirirwa isuku.”

Twiga itangazwa n'ibyo, iti “muswa we, buri kintu cyose kiri aha gifite isuku! Abana bawe bameze neza, bafite isuku, bafite ubuzima bwiza. Abana banjye bo bahora barwaye. Wamenya impamvu bahora barwaye? Ntiwambwira impamvu koko?”

Wa muswa ureba Twiga. Nuko ubona Twiga irasa nabi, ifite umwanda mwinshi ariko ntiwagira icyo ubivugaho, uricecekera. Hanyuma uravuga uti “birababaje! Jye, abana banjye ntibajya barwara. Nta cyo nagufasha rero.” Twiga imaze kumva ayo magambo, ikomeza urugendo.



Iragenda, inyura ku **cyari** cy'inyoni cyari mu git
hejuru. Inyoni, yo n'abana bayo byarimo bikora
isuku, bikubura icyari cyabyo.

Hashize akanya inyoni ihamagara abana
bayo irababwira iti “bana ba, ibikoresho
byose bigomba kozwa. Imyenda yose igomba
kumeswa, ibisaswa byose bigasukurwa.
Ntimwibagirwe gukaraba neza. Buri gikoresho
cyose kiri aha, kigomba kugirirwa isuku.”

Twiga itangazwa n'ibyo, iti “nyoni we, buri kintu
cyose kiri aha gifite isuku! Abana bawe bameze
neza, bafite isuku, bafite ubuzima bwiza. Abana
banje bo bahora barwaye. Wamenya impamvu
bahora barwaye? “Ntiwambwira impamvu
koko?”



Ya nyoni ireba Twiga. Ibona Twiga irasa nabi, ifite umwanda mwinshi ariko ntiyagira icyo ibivugaho, iricecekera. Hanyuma iravuga iti “birababaje. Jye, abana banje ntibajya barwara. Nta cyo nagufasha rero.”

Nuko Twiga ikomeza urugendo, isubira mu rugo. Igenda itekereza ku byo yabonye n'ibyo yumvise byose.



Mu cyumweru gikurikiyeho, abaturanyi ba Twiga batangazwa no kubona **imibereho ya Twiga** n'abana bayo yahindutse cyane.

Bumva Twiga ibwira abana bayo iti “bana ba, ibikoresho byose bigomba kozwa. Imyenda yose igomba kumeswa, ibisaswa byose bigasukurwa. Ntimwibagirwe gukaraba neza. Buri gikoreho cyose kiri aha, kigomba kugirirwa isuku.”

Kuva ubwo, Twiga n'abana bayo ntibongera kurwara ukundi.



Inyunguramagambo

- **imiswari:** udutambaro twakorewe kwipfunisha.
- **kwiheba:** kugira agahinda kenshi kavanze no kubura ibyiringiro.
- **kugisha inama:** kubaza abakuruta cyangwa abakurusha ubwenge icyo wakora kugira ngo ubonere igisubizo ikibazo ufite.
- **imiswa:** udusimba tuba mu butaka tujya gusa n'intozi, dukunda kujya imusozi tukamunga ibiti.
- **umugina:** ubutaka butumburutse burundwarundwa n'imiswa cyangwa utundi dusimba tumeze nka yo tugaturamo.
- **icyari:** inzu inyoni zikorera zikoresheje ibyatsi zikabamo zikanatereramo amagi.
- **imibereho ya Twiga:** ubuzima bwa Twiga.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe, bakubwire igisubizo.

1. **Ni ba nde** bavugwa mu nkuru?
2. **Ni hehe** Twiga yiyemeje kujya ibonye abana bayo barwaye?
3. **Ni iki** Twiga yabonye igeze aho inzovu Mutware, umuswa n'inyoni byari bituye?
4. **Kubera iki** abana ba Twiga bahoraga barwaye?
5. **Ni gute** Twiga yashoboye gutuma abana bayo bagira ubuzima bwiza?

Busyete yagize igitekerezo cyiza



Yanditswe na L3 Initiative
Yashushanyijwe na Jean de Dieu Munyurangabo

Ku musozi umwe wa Matyazo, hari umusore witwaga Busyete. Mu muryango we, bari boroye inka nyinshi.

Buri wa gatandatu, Busyete yafashaga ababyeyi be kuziyobora mu rwuri. Izo nka zose zari zifite imico myiza uretse imwe yitwaga Bihogo. Iyo nka Bihogo, yakundaga **gutana**, ikarenga urwuri rwayo, ikajya kona ibihingwa by'abaturanyi. Cyakora yakamwaga amata aryoshye cyane.




Ku wa gatandatu mu gitondo, Busyete yahuye inka zose, azijyana mu **rwuri** rwari hafi y'imirima. Mu gihe Busyete yari arimo yiruhukira munsi y'igiti cy'umuvumu, Bihogo iramurabukwa maze iranyaruka, itana ijya mu rugo rw'umuturanyi wa Busyete witwaga Syori.

Busyete abonye Bihogo yiruka, aravuga ati “yebabaweee! Na none Bihogo iragiye koko? Koko pe?” Agerageza kuyirukaho ngo ayigarure ariko biranga. Iyo nka Bihogo, yari izi kwiruka bidasanzwe.




Bihogo iriruka, iravuduka, igera mu rugo
rw'umuturanyi Syori wari urimo utsyaza icyuma ku
ityazo rinini. Bihogo irakebuka, ibona umushumba
wayo Busyete inyuma yayo. Bihogo irushaho
kuvuduka, itana ijya mu gikari aho umugore wa
Syori witwaga Nyiramatyori yari ari. Nyiramatyori,
yari amaze gusya uburo, ajyanye mu nzu ifu yari
amaze gusya.

Nyiramatyori yumva ikintu kiza gikubita imirindi,
maze arahagarara abona Bihogo isyonyoye
uburo bwari ku rusyo yaseragaho, maze ikomeza
yinjira mu gikoni! Nyiramatyori arumirwa, abura
icyo akora n'icyo areka.



Nuko Bihogo igeze mu gikoni, ihita ihagarara, ireba hirya ireba hino, maze ibona ahari hegetse igitoki gitohagiye. Nuko izamura umutwe, itamira **iséri** ryose ry'igitoki, yuzuza amatama, maze ikajya ihekenya, ikamira. Bihogo yari yishimye cyane maze itangira kuzunguza umurizo wayo hirya no hino. Umurizo wa Bihogo ukajya ukubita ku byungo, ugakubita mu masahani, mu ndobo no mu bindi bikoresho bya Nyiramatyori, bigatembagara hasi, nuko urusaku rukaba rwinshi cyane.

Nyiramatyori, Busyete na Syori bumva urwo rusaku, baza biruka cyane. Bahageze babona Bihogo yariye icya kabiri cy'igitoki cyose cya Nyiramatyori. Nuko Busyete asaba imbabazi umuryango wa Syori na Nyiramatyori. Busyete yirukana Bihogo ayikura ku gitoki, maze abizeza ko Bihogo itazongera gusohoka ngo ijye hanze y'urwuri.



Muri iryo joro, Busyete arara atekereza icyo yakorera Bihogo. Ako kanya yibuka ibyo mwarimu wabo wa siyansi yabigishije ku bijyanye n'ubworozzi bw'inka.

Nuko abyuka mu buriri bwe, avuga asakuza ati “menye icyo nzakora! Menye icyo tuzakorera Bihogo kugira ngo itazongera gutana ijya gushaka ibyo kurya!”



Mu gitondo, mu gihe bafataga ifunguro rya mu gitondo, Busyete aravuga ati “mama, Papa, namenye icyo twakorera inka yacu Bihogo kugira ngo itazongera konera abaturanyi. Twubatse **ikiraro** inyuma y'inzu, twajya dushyiramo Bihogo ikagumamo maze ntishobore gusohoka. Ntabwo yashobora kongera gutana ngo ijye ku musozi gushaka ibyo irya.

Twajya tuyahirira ibyatsi tukayigaburira mu kiraro. Ibyo bizatuma Bihogo itazongera kujya kurya ibitoki bya Nyiramatyori no kwangiza indi mitungo y'abandi.”

Nuko Busyete yongeraho ati “ibi mbabwiye kandi, nabyigiye mu ishuri, mu isomo rya siyansi.”

Nuko ababyeyi batangira kwibaza ku gitekerezo cya Busyete. Ntibari barigeze babitekerezaho mbere.


Bakomeje kubitekerezaho, nuko baza gusanga icyo gikorwa cyaba ari ingirakamaro.

Nuko ababyeyi be baramushimira batí “urakoze Busye, icyo gitekerezo ni cyiza, ibi utubwiye biratwigishije. Ibi wize, none natwe ukaba ubitwigishije biradushimishije cyane.”



Kuva uwo munsi, Busyete n'ababyeyi be bakajya bakama amata aryoshye ya Bihogo, batongeye guhangayika. Kuva ubwo, Bihogo ntiyongera kujya kwangiza imitungo y'abaturanyi. Busyete yahiraga ibyatsi biryoshye buri munsi akagaburira Bihogo n'izindi nka mu kiraro.

Kuva ubwo, Bihogo iguma mu kiraro cyayo, iratuza,
ishisha yumva.



Inyunguramagambo

- **gutana:** kwiruka ku gasozi kw'amatungo iyo ashaka kujya kona imyaka .
- **urwuri:** ahantu hagenewe kuragirwa amatungo.
- **ityazo:** ibuye rinini risennye bakunda gutyazaho ibyuma.
- **iseri:** itsinda cy'amabere y'ibitoki .
- **kuza kw'amatungo:** ni igihe amatungo agarura ibyatsi yariye abivana mu gifu abigarura mu kanwa ngo abikanjakanje abinoze yongere abimire .
- **ikiraro:** inzu amatungo yororerwamo.
- **ishisha yumva:** iratuba igubwa neza iranabyibaha.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa mu nkuru?
2. **Ni hehe** iyi nkuru ibera?
3. Ni iki cyabaye kuwa gatandatu mu gitondo?
4. **Kuki** inka Bihogo yari itandukanye n'izindi nka?
5. **Ni gute** Busyete yaje gukemura ikibazo?

Umunyamatsiko Nyirahovwa



Yanditswe na L3 Initiative
Yashushanyijwe na Dolph Banza

Nyirahovwa yari umwana w'umunyamatsiko cyane. Yahoraga abaza ibibazo kuri buri kintu yabonaga. Abantu bamwe barabyinubiraga ariko nyina Muhovyi we byaramushimishaga cyane. Muhovyi yari azi neza ko kubaza ibibazo k'umukobwa we nta cyo bitwaye kuko byamufashaga gusobanukirwa ibintu bimukikije.

Buri gihe uko Nyirahovwa yamenyaga ikintu gishya, yihutiraga kukibwira umwarimu na bagenzi be biganaga ku ishuri. Yakundaga kuvumbura cyane, kandi yakundaga no kubwira abandi udushya yavumbuye.



Umunsi umwe, Nyirahovwa na Nyina Muhovyi bari bicaye ku rubaraza bareba mu busitani bwari imbere y'inzu yabo. Hari ku **gasusuruko**, akayaga keza gahuha aho mu busitani, kanyeganyeza uturabo twiza twarimo. Nyirahovwa na nyina barimo bota akazuba. Nyirahovwa we yari arimo arigata ubuki yishimye cyane. Yakundaga kurigata ubuki cyane.

Bakomeje kota akazuba, hashize akanya Nyirahovwa atangira kureba ku ntoki ze, zari zimaze kuzura ubuki. Nuko ahita abaza nyina n'amatsiko menshi ati "mama, ubuki buva he?"

Nyina ati "urabizi se mwana wa, ubuki buva ku isoko." Nuko Nyirahovwa **aramwenyura** maze akomeza kurigata ubuki ku ntoki ze, ariko, akomeza kugira amatsiko maze yongera kubwira nyina ati "ndabizi ko tubugura ku isoko. None se ni nde uba wabukoze?"



Nyina ati “ese ni ibyo washakaga kumenya! Ubundi ubuki buhakurwa n’abantu bitwa **abavumvu**. Abavumvu baboha imitiba cyangwa bakabaza **imizinga** bakororeramo inzuki, nyuma bakazahakuramo ubuki. Bakunda kurya ubuki cyane no kuburigata nkawe neza neza.” Amatsiko ya Nyirahovwa yarushijeho kwiyongera, kuko yahise avana intoki mu kanwa maze yongera kubaza nyina ati “eeeh..., Nabyumvise. Ariko se ubwo buki buba bwavuye he?”

Nuko Nyina aramwenyura maze yongera kumubwira ati “urabizi se? Inzuki ni zo zikora ubuki. Kandi zizi kubukora neza cyane.”

Nyirahovwa yahise atangara cyane ati “ni byo! Inzuki se koko ni zo zikora ubuki?” Nyina yaramusubije ati “cyane rwose.” Arakomeza ati “reba ziriya ndabo ziri mu busitani bwacu, buriya zose uko uzibona **zihovwamo** n’inzuki.

Inzuki ziva mu mizinga yazo, zikaguruka zishakisha udufu two gukoramo ubuki, mbese nka tumwe two mu ndabo. Iyo zimaze kutubona, zitujyana mu mizinga zigahita zikoramo ubuki. Inzuki zikenera indabo nyinshi kugira ngo zibashe gukora ubuki.

Nyirahovwa yahise **yumirwa**, akomeza kwibaza ku byo nyina amubwiye, akambiye agahanga. Nuko hashize akanya abwira nyina ati “yee, ndumiwe pe! Ngo inzuki zihova mu turabo hanyuma udufu zahovye zikadukoramo ubuki! Ngo zikeneye kandi n’indabo nyinshi kandi nziza!” Nuko arakomeza ati “ariko se ko nshimye zihova mu ndabo, ubwo zibigenza zite ngo zibone indabo zihagije?”



Nyina yahise amusubiza ati “ariko uzi ko uri umunyamatsiko koko?” Arakomeza ati “urabizi se, ako ko ni akazi kacu. Tugomba kwita ku bidukikije twirinda kwangiza ibihingwa n’indabo. Turamutse rero tutabungabunze ibidukikije, inzuki ntizashobora gukora ubuki, zidashoboye gukora ubuki, ubwo natwe twaba tububuze burundu.”

Nyirahovwa yakomeje kurigata ubuki, anatekereza ku byo nyina yari amaze kumubwira. Muri ako kanya, yarabutswe uruyuki rwari ruri ku rurabo rwa Roza aho mu busitani.

Nyirahovwa yongeye kwitegerezza ubuki bwari bwuzuye mu kiganza cye, arongera yitegerezza na rwa ruyuki. Uruyuki na rwo rwaramwitegerezza, ruramwenyura, rumwicira ijisho maze rurigurukira.



Nyirahovwa byaramushimishiye cyane ndetse atangira no guseka. Yahise abwira nyina ati “urabizi mama, ubu namaze kubona icyo nzabwira mwarimu n’abana twigana ejo ku ishuri.”



Inyunguramagambo

- **agasusuruko:** akazuba ka mu gitondo hagati ya saa moyo na saa tatu.
- **kumwenyura:** guseka ariko ntukubite igitwenge , bikagaragara ku maso gusa.
- **abavumvu:** aborozi b'inzuki.
- **imizinga:** imitiba y'inzuki.
- **guhova:** Gutara kw'inzuki/kujya gushakisha ibikora ubuki kw'inzuki .
- **kumirwa:** kubura ikindi wakora kubera ibantu byakurenze.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa mu nkuru?
2. **Ni hehe** inkuru ibera?
3. **Kuki** Nyirahovwa yabazaga ibibazo byinshi?
4. **Ni iki** Nyirahovwa yize igihe yari arimo ary ubuki?
5. Ni **gute** iyi nkuru irangira?

Inkoni y'amayobera



Yanditswe na L3 Initiative
Yashushanyijwe na Seif Bizimana



Igihe kimwe, ku musozi wa gatsata, haguye imvura nyinshi. Iragwa iragwaaa, imyaka irarengerwa, indi amazi arayitwara.

Imvura yari nyinshi ku buryo abaturage batashoboye gusarura imyaka yabo. Ibyo byatumye babura ibiribwa byo kurya.



Gasatsi, yari atuye kuri uwo musozi wa Gatsata. Yagize inzara maze aribwira ati “ngiye gushakashaka amafunguro.” Afata agafu k’uburo yari asigaranye akagira **impamba**.

Afata inzira aragenda, aragenda aterera umusozi wa mbere. Arakomeza aragenda, atangiye guterera umusozi wa gatatu, arabukwa umwotsi waturukaga mu gashyamba gato kari hafi aho.

Gasatsi **agira amatsiko**, aribaza ati “uyu mwotsi uraturuka he?” Mu gihe yari atangiye kwinjira muri ako gashyamba, agiye kumva yumva umuntu aritsamuye ngo “tsee!”



Nuko Gasatsi aribwira ati “uwo ni umuntu witsamuye pe!” Umwotsi utuma umuntu yitsamura.” Aratekereza ati “ahari umwotsi, haba hari umuriro, ahari umuriro, haba hari umuntu utetse ibyo kurya.”

Nuko akomeza kugira amatisko. Aromboka, arunguruka mu gahuru kari aho mu gashyamba, maze arabukwa ikintu gisa n’umuntu, aratangara cyane.



Gasatsi agiye kubona abona umugabo munini cyane atigeze abona na rimwe. Yari ahagaze imbere y'inzu nini y'ibyatsi. Iruhande rwe hari inkoni y'igiti **itatse** amabara meza.

Gasatsi abonye iyo nkoni agira ubwoba. Aribwira ati “iyi nkoni ni inkoni y'amayobera? Cyangwa se ni inkoni yo gukubita abashyitsi baje hano batabashaka?”

Uwo mugabo munini yari ateye amatsiko cyane. Yari afite **ibitsike** byinshi, umusatsi muremure n'**imyotso** mu ruhanga. Nyamara, Gasatsi yitegereje neza, abona wa mugabo arebana impuhwe. Wa mugabo akajya arunguruka Gasatsi aho yari ahagaze.

Nuko uwo mugabo aramwenyura cyane. Ni ubwa mbere Gasatsi yari abonye umuntu useka neza gutyo! Azamura ikiganza asuhuza Gasatsi ati “waramutseho ncuti yanje? Nitwa Gapfizi. Wowe witwa nde?”

Gasatsi na we aramwenyura, aramusubiza ati “nitwa Gasatsi. Naturutse kure, naje gushakisha icyo kurya, ndashonje cyane.” Gapfizi areba Gasatsi maze aravuga ati “nokeje agafi kamwe, reka gashye maze tugasangire.”



Gasatsi abonye iyo fi, **agira ipfa**, yirigata iminwa, maze aravuga ati “murakoze cyaneee! Nanje reka **mvuge agatsima** muri aka gafu k’uburo , maze dusangire.”

Gapfizi akubita igitwenge ati “ndagukunze cyane. Kuva ubu ubaye incuti yanje.” Gasatsi na Gapfizi barakomeza bateka bishimye.

Mu gihe bari batetse, ya fi itangira kugenda ihumura neza, na wa mutsima utangira kugenda uhindura ibara. Ariko mu gihe Gasatsi yari ategereje, **amerwe** aramwica maze akumva yafata kuri ya fi akaryaho.

Gapfizi we aratekereza ati “iyi fi ntishobora kuduhaza.” Muri ako kanya, aterura ya nkon. Gasatsi abibonye aravuga ati “oya, oya, ugiye kunyirukana hano?” Nyamara si ko byari bimeze.



Gapfizi atunga ya nkoni ye kuri ya fi, ako kanya ivamo amafi abiri. Nuko Gapfizi abaza Gasatsi ati “ese wowe urabona aya mafi abiri ari buduhaze?”

Mbere y'uko Gasatsi asubiza, Gapfizi arongera afata ya nkoni maze aramubwira ati “ncuti yanje waturutse kure, urashonje cyane, reka twotse ibihagije.” Ako kanya afata ya nkoni ayikoza kuri ya mafi abiri maze ako kanya ahindukamo ane!

Gasatsi aratangara cyane, nuko abaza Gapfizi ati “ibi ubikoze ute?” Bwa mbere hari ifi imwe, nyuma ahinduka abiri, none abaye ane!



Nuko Gapfizi aramusubiza ati “iyi ni inkoni y’amayobera. Nayihawe na nyogokuru, hashize imyaka myinshi.”
Gasatsi abaza Gapfizi ati “ese birashoboka ko n’uyu mutsima watubuka, ukagenda wikuba kabiri?”

Gapfizi araceceka, maze afata ya nkoni ayitunga kuri wa mutsima. Byagenze gute? Cya gisate cy’umutsima cyikubye kabiri, kivamo ibisate bibiri. Hanyuma, bya bisate bibiri na byo bivamo ibisate bine. Nuko Gapfizi arisetsa abaza Gasatsi ati “urashaka ko nkomeza kubikora gutya?”




Gasatsi areba ayo mafi yose n'uwo mutsima, maze **amazi amwuzura akanwa**. Yumva agize icyifuzo gikomeye.

Areba Gapfizi maze aramubwira ati “ndifuza ko wakomeza kubyongera. Abantu bose bo ku musozi wacu barashonje. Ese iyi nkoni yawe ishobora gutubura aya mafi n'uyu mutsima ku buryo byahaza abo bantu bo ku musozi wacu?”

Gapfizi yegera ya mafi na ya mitsima maze atungaho ya nkoni ye y'amayo bera. Ya nkoni itangira gukora, ya mafi na ya mitsima biratubuka, byikuba inshuro nyinshi, byuzura **imbuga** yose.



Nuko Gapfizi ariyumvira akanya gato. Asohoka
gato, ahamagara mu ijwi riranguruye. Aravuga
ati “baturage mwese ba Gatsata! Nimuze hano
dusangire umutsima n’amafi biryoshye cyane.”



Nuko rya jwi ririrangira, maze rigera ku bantu
benshi cyane bo ku musozi wose wa Gatsata.
Bose baza biruka. Bahageze, barasangira,
bararyaaa, maze **barahembuka**.



Buri gihe, iyo bya biryo byajyaga gushira, Gapfizi yarongeraga agakoresha ya nkoni ye maze akabitubura, kugira ngo hatagira ubura ibiryo bimuhagije.

Abaturage ba Gatsata babonye ibyo, baratangara cyane. Bose bose bamaze kwijuta, umuyobozi wabo arahaguruka maze afata ijambo. Aravuga ati “Gapfizi, udukijije inzara. Ni iki wifuza ko twagukorera ngo tugushimire?”

Gapfizi ariyumvira ati “mfite iyi nkoni y'amayo bera, ariko mba mu bwigunge. Abaturage ba Gatsata ni zo ncuti zanje za mbere. Ese mwareka ngakomeza kubana namwe?” Nuko umuyobozi akubita aga ati “ibyo ni byo rwose.” Gapfizi na we arishima. Wa muyobozi arongera ati “ntiwibagirwe kuzana iyo nkoni yawe , kuko dushobora kongera kuyikenera.”



Inyunguramagambo

- **kugira amatsiko:** kumva ushaka kureba ikintu baguhishe, gushaka kumenya uko ikintu bagikora cyangwa uko giteye.
- **impamba:** ni ibiryo upfunyika ukabyitwaza ugiye ku rugendo.
- **itatse:** irimbishijwe.
- **ibitsike:** ubwoya bwo hejuru y'amaso.
- **imyotso:** inkovu zo ku mubiri ziterwa n'icyuma bashuhije bakagikoza ku mubiri hagashya nk'uburyo bw'ubuvuzi bwa gihanga.
- **nyogokuru:** nyina wa so cyangwa wa nyoko.
- **kugira ipfa:** kurarikira ibiryo.
- **kuvuga umutsima:** gukora umutsima.
- **amerwe:** ipfa .
- **amazi amwuzura akanwa:** agira ipfa ryinshi kugeza ubwo amacandwe aba menshi mu kanwa.
- **imbuga:** ahantu haharuye iruhande rw'inzu.
- **guhembuka:** gukira inzara cyangwa inyota bitewe n'uko ubonye uturyo duke cyangwa amazi yo kunywa.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni nde** wari ufite inkoni y'amayobera?
2. **Ni hehe** gasatsi yari atuye?
3. **Kuki** Gasatsi yavuye ku musozi we?
4. **Ni iki** cyabaye nyuma y'uko Gasatsi ahura na Gapfizi?
5. **Ni gute** iyi nkuru irangira?

Isupu y'igishuhe



Yanditswe na L3 Initiative
Yashushanyijwe na Dolph Banza

“Huuu! Biraryoshye!” Igishuhe cyari cyishimye kirigata **indoshø**. Kuva aho kirangirije amashuri yo kwiga guteka mu ishuri rya Shyorongi, cyakomeje kwifuza kugira resitora.

Cyari cyarabitse **umushahara** wacyo wose cyari cyarakoreye mu myaka cyamaze gikora umurimo wo guteka mu maresitora. Cyashakaga kujya giteka neza ku buryo budasanzwe, maze abantu bakshima. Ni yo mpamvu icyo gishuhe, cyashakaga ko iyo resitora izitwa “resitora ibyishimo.” Igishuhe cyifuzaga gufungura bwa mbere iyo resitora kuri uwo mugoroba. Cyifuzaga ko inshuti zacyo zose ziza.



Igishuhe cyari kirimo giteka isupu iryoshye cyane
yo guha abakiriya bacyo. Cyafashe imboga
zitoshye kirazisya kugira ngo giteke iyo supu.

Cyakoresheje amashu, gikoresha n'ibishyimbo.
Cyakoresheje karoti, gikoresha n'ibirayi.
Cyakoresheje kandi n'**ibirungo** bidasanzwe.
Igishuhe cyashakaga guteka isupu iryoshye
cyane incuti zacyo zitari zarigeze kurya.




Nuko igishuhe **cyenyegeza** amashara mu ziko ryari riteretseho icyungo cyari kirimo iyo supu. Cyashakaga kuyisiga ku ziko ku kario gake nko mu gihe cy'isaha maze iyo supu igashya neza ku gihe cyo gufungura resitora.


Nuko gitangira kwitegura kujya gukingura resitora. Gikaraba munsi y'amababa yacyo, cyiyogosha no ku munwa wacyo.

Nuko igishuhe cyirukira aho kibika imyenda yacyo. Gihitamo **ishati ishashagira**, gihitamo inkweto n'umushumi w'umukara . Hanyuma gitekereza kujya ku isoko gushaka igisheke abakiriya baza gusorezaho barya. Igishuhe gisiga ya supu itogotera ku ziko ku kario gake.





Muri ako kanya, inshuti z'igishuhe ziza kucyifuriza
ishya n'ihiwe muri iyo resitora nshyashya. Muri
ako kanya, isha yitwaga Gashyashya, urukwavy
rwitwaga Gasheshe, n'intashya yitwaga
Mushyoshyo zaje mu rugo rw'igishuhe, ariko
ntizakibona.



Isupu yavaga mu cyungo yarahumuraga cyane.
Nuko isha irabyumva, iravuga iti “hmuuuuu!
Mbega isupu ihumura neza!”

Urukwavu rwongeraho ruti “igishuhe cyagiye he?
Ntabwo cyajyaga gisiga ibiryo byacyo gutya
bidapfundikiye.”

Ako kanya, intashya yari irimo yitemberera
hejuru, irabukwa ikintu cyatemberaga mu
cyungo cyarimo isupu. Intashya iti “ igishuhe
cyaguye mu isupu reka tugikuremo!”

Inyamaswa zitangira guhangayika. Nuko urukwavu ruti “reka ngerageze gufasha igishuhe, dore cyaguye mu isupu.” Nuko rufata indosho, rukoza mu isupu kugira ngo igishuhe kibashe kuzamukiraho. Nyamara ubushyuhe bwavaga mu cyungo butangira gutwika amatwi y’urukwavu. Nuko urukwavu rusubira inyuma ruhunga ubushyuhe, maze isupu inyanyagira hose.

Ako kanya, isha na yo iti “nimuhumure, reka nze mfashe igishuhe kuva mu isupu.” Nuko ikoza amahembe mu isupu, maze ubushyuhe buva mu cyungo butangira gutwika mu ruhanga rw’isha. Nuko isha isubira inyuma ihunga ubushyuhe maze isupu inyanyagira hose.

Ako kanya, intashya iti “nimuhumure, reka nze mfashe igishuhe kuva mu isupu.” Nuko ifata ishami, ikoza mu isupu maze ubushyuhe buva mu cyungo butangira gutwika umurizo w’amabara meza y’intashya. Nuko intashya isubira inyuma ihunga ubushyuhe maze isupu inyanyagira hose.



Muri ako kanya, igishuhe kiraza, kigera mu gikoni. Cyaje kiririmba cyishimye. Igishuhe cyari cyikoreye igikapu kiboshye cyuzuyemo ibisheke. Igishuhe kireba hirya no hino, maze kibona ibyabaye mu gikoni kirumirwa. Za ncuti z'igishuhe zikibonye zirishima cyane. Zikajya zigitekerereza inkuru y'ibyo zakoze, kuko zakekaga ko igishuhe cyaguye mu isupu.

Zifasha igishuhe gutunganya ibintu byose byari mu kajagari. Zigiha umwanya wo guteka ibyari bisigaye, maze na zo zigifasha gutegura ameza yo kuriraho ifunguro rya nimugoroba.



Muri uwo mugoroba, abakiriya baza ari
benshi cyane muri resitora “Ibyishimo.” Bose
barazaga bakubita amaso iyo supu, amazi
akuzura akanwa, bakagira ipfa. Nuko bakarya,
bakshima, bagaseka, bagakomera igishuhe
amashyi. Bose babazaga bati “iyi supu yitwa
gute?” Igishuhe kikareba za ncuti zacyo
zose cyishimye, kikabasubiza kitii “yitwa isupu
y’igishuhe!”



Inyunguramagambo

- **indosho:** ikiyiko cy'igitu barishaga kera.
- **umushahara:** amafaranga y'ibihembo uhabwa buri kwezi kubera akazi ukora.
- **ibirungo:** ibintu bongera mu biryo ngo babyongerere uburyohe.
- **kwenyegeza umuriro:** Gushyiramo inkwi neza kugira ngo ukomeze wake cyane.
- **ishati ishashagira:** ishati irabagirana.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa mu nkuru?
2. **Kuki incuti** z'igishuhe zari zagize ubwoba?
3. **Ni hehe** igishuhe cyari cyagiye ubwo incuti zacyo zagishakaga?
4. **Ni iki** cyabaye igihe igishuhe cyari cyagiye ku isoko?
5. **Ni gute** inkuru irangira?

Igihembe cya 3

Impano ishimishiye



Yanditswe na L3 Initiative
Yashushanyijwe na Seif Bizimana


Umunsi umwe, Mbaraga abyukijwe n'akazuba
k'agasusuruko kamurasiyeho. Mbere y'uko
afungura amaso, yibuka ko uwo munsi
wari umunsi w'isabukuru y'ivuka rya nyina.
Mbaraga yakundaga nyina cyane kuko yari
yaramureranye urukundo, impuhwe n'imbabazi
nyinshi.



Mbaraga yifuje guha nyina impano nziza. Yifuje kumuha impeta nziza ishashagira ya Zahabu. Yifuje kumugurira imyambaro myiza cyane. Ariko se ko nta mafaranga yari afite, ibyo byari gushoboka gute?

Mbaraga aribwira ati “ngiye gushakisha impano na ha mama.” Nuko afata inzira aragenda anyura mu ishyamba. Muri iryo shyamba, harimo ibyatsi byinshi, ibiti by’imbuto, harimo kandi utunyoni twiza twinshi turimo imisambi. Mu gihe yaritambagiraga, arabukwa impara. Izo mpara zari impanga. Zarishaga mu rwuri, nuko Mpamo arazisuhuza.

Arazibwira ati “mumbabarire mumpe akanya mbabwire ikibazo cyanje , mumpe inama z’icyo nakora.” Mbaraga abwira impara, ati “ndimo ndashakashaka impano. Ese hari impano nabona yo gutanga ariko itagura amafaranga?”



Impara zirasubiza ziti “turatekereza ko impano nziza ya mbere waha umuntu ari impano yo kuvugisha ukuri, ukuri kw’impamo.”

Mbaraga arasubiza ati “ko nta kuri kw’impamo mfite ko kuvuga? Ndakomeza nshakishe imbere hariya.” Mbaraga abaza impara ati “ese mushobora kumperekeza mu rugendo rwanje?”

Impara zisubiza Mbaraga ziti “yego, turaguherekeza.”

Impanga z’impara, zifata urugendo zijyana na Mbaraga, bikora itsinda rya batatu.




Mu kanya gato, bahura n'**imbeba eshatu zitaragaje** ku kazuba. Za mbeba zireba Mpamo na za mpara. Imbeba zirajwigira ziti “murajya he?”

Nuko Mpamo asubiza imbeba ati “ndimo ndashakashaka impano.”

“Nta mafaranga mfite, ese hari impano nabona yo gutanga itagurwa amafaranga?” Imbeba ziratekereza ziti “hmmm!” Nuko Imbeba zisubiza Mpamo ziti “igikorwa cyoroheje wakorana umutima w’impuhwe n’imbabazi cyaba gifite agaciro kanini.”

Mbaraga ntiyanyurwa. Aravuga ati “ndakomeza nshakishe imbere hariya.”

Mbaraga abaza imbeba ati “ese mushobora kumperekeza mu rugendo rwanje?” Imbeba zisubiza Mbaraga ziti “yego, turaguherekeza.” Impanga z’impara, Mbaraga na za mbeba bifata urugendo bijyana na Mbaraga, bikora itsinda rya batandatu.



Nyuma y'igihe gito, rya tsinda rihura n'imparage enye zavaga inda imwe, ziganira, zishimye. Mbaraga ahagarika za mparage ati “mumpe akanya mbabwire ikibazo cyanje , hanyuma mumpe inama.”


Mbaraga abwira imparage, ati “ndimo ndashakashaka impano. Ese hari impano nabona yo gutanga itagurwa amafaranga?” Imparage nkuru muri zo iravuga iti “ibyo biroroshye cyane. Impano y'agaciro ushobora guha umuntu ni impano yo kubaha.” Mbaraga ntiyanyurwa. Aravuga ati “ndakomeza nshakishe hariya imbere.”

Mbaraga abaza imparage ati “ese mushobora kumperekeza mu rugendo rwanjye?”

Imparage zisubiza Mbaraga ziti “yego, turaguherekeza.”


Za mpara ebyiri, za mparage enye Mbaraga na za mbeba eshatu bifata urugendo, mu itsinda ry'abagenzi icumi.

Mu nzira zigenda, za nyamaswa zigenda **zijya impaka** kuri bya bitekerezo byose, zibaza impano yaba nziza kurusha izindi.



Ziragenda, ziragenda, bidatinze, ikirere
kirahinduka maze igicu kirijima, maze izuba
risa n'aho rirenze. Nuko impara ziravuga ziti
“burije, reka dutahe.” Nuko muri rya tsinda
ry'icumi havamo impara ebyiri, hasigara itsinda
ry'umunani.

Nyuma y'iminota mike, imbeba zikurikiraho.
Ziravuga ziti “burije, reka dutahe.” Nuko
muri rya tsinda ry'umunani havamo imbeba
eshatu hasigara itsinda rya batanu. Noneho
hakurikiraho imparage, na zo ziravuga ziti
“burije, reka dutahe.” Nuko muri rya tsinda rya
batanu havamo imparage enye hasigara
umuntu umwe ari we Mbaraga.



Mbaraga asigaye wenyine, atangira kumva **imbaraga zigabanutse**, asubira iwabo, maze agenda atekereza yibaza. Mu nzira, anyura ku gihuru cy'uturabo twiza maze aritonda, araduca, aducuma neza maze ataha yihuta. Agikingura urugi rw'igikoni, abona nyina afatisha imbabura. Iruhande rwe hari imbehe iriho imboga zitoshye yari amaze gukata ngo ateke. Yari ahetse kandi umwana we muto mu **mpetso**.

Nyina amurabutswe aravuga ati “Mpano mwana wanjye, nari nagize impungenge. Nari nagize ngo wagize impanuka kuko ubu, nari hafi yo guhamagaza **imbangukiragutabara**.”

Mbaraga ariruhutsa. Yari afite impungenge. Nuko abwira nyina ati “mama we, kuri uyu munsi w'isabukuru y'amavuko yawe, ngufitiye impano nyinshi.”

Nuko nyina aramubwira ati “Mbaraga mwana wanjye wikkigora. Si ngombwa ko umpa impano. Nta n'ubwo nibukaga ko uyu munsi ari umunsi w'amavuko wanjye. Sinigeze ntekereza ko wampa impano.”

Nuko aravuga ati “ndashaka kuguha impano yo kuvugisha ukuri buri gihe, ukuri kw'impamo. Nashakashatse umunsi wose impano naguha, nsaba inama, none ubu namenye icyo ngomba gukora.”



Nakugeneye impano y' urukundo, impuhwe n'imbabazi, kuko mpora nzirikana ko wanderanye urukundo, impuhwe n'imbabazi. Iyi mpano iroroheje ariko ivuye mu mutima wanjye.” Amuhereza indabyo z'amabara meza menshi yari yahishe inyuma ye. Nyina azibonye araseka aranezerwa cyane.

Hanyuma Mbaraga arapfukama, noneho abwira nyina ati “ndagira ngo nkwereke ko nkubaha. Wanyigishije ibintu byinshi, ndizera ko kuva ubu nzajya **nguhesha ishema**.” Mbaraga aravuga ati “nta gihembo nabona kigukwiriye kuko wandeze neza, none impano ya nyuma ngufitiye...” Nuko aramuhobera cyane, abwira nyina ati “mama ndagukunda, kandi nzakomeza kugukunda. Menya ko ngukunda kandi nkubaha mama!”

Nyina wa Mbaraga arishima cyane kugeza ubwo ataye amarira. Aramubwira ati “urakoze Mbaraga mwana wanjye, urakoze kumpa izi mpano zose.” Nuko Mbaraga na nyina barahoberana cyane.



Inyunguramagambo

- **imbeba zitaragaje:** ziri ahitaruye zota akazuba
- **kujya impaka:** Gutanga ibitekerezo bivuguruzanya ku ngingo runaka.
- **imbaraga zigabanutse:** atangiye kuruha.
- **impetso:** ingobyi bahekamo umwana mu mugongo/inkosha.
- **imbangukiragutabara:** imodoka ishinzwe kugeza abarwayi kwa muganga ku buryo bwiuse/ ingobyi y'abarwayi.
- **guhesha umubyeyi ishema:** gukora ibikorwa byiza bituma bashima umubyeyi wakubyaye bamushimira ko yareze neza, kumuhesha agaciro, kumuhesha ikuzo.


Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikitabura ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa muri iyi nkuru?
2. Iyi inkuru yabaye **ryari**?
3. Mbaraga yashakaga **iki** mu ishyamba?
4. Mbaraga yashakaga guha nyina impano idasanzwe ku munsi mukuru we w'amavuko. **Kubera iki?**
5. **Ni iyihe** impano Mbaraga yaje kwiyemeza gutanga?

Icyungo gitangaje



Yanditswe na L3 Initiative
Yashushanyijwe na Rupert Bazambanza

Kera habayeho umukecuru witwaga
Mukandinda n'umwuzukuru we witwaga
Kivamvari. Kivamvari uwo yari umukobwa
witonda kandi yahoraga yirinda ingeso mbi.
Imvura yamaze amezi menshi itagwa, maze
Mukandinda agira impungenge z'uko azabaho
kubera ko imyaka yari yarapfuye yose. Yaba iyo
mu kabande, y'imusozi, ku buryo nta cyo kurya
bari bagifite. Abantu bose bari bafite inzara
ikabije.

Umuni umwe, umukecuru Mukandinda yatetse
agafu n'udushyimbo yari asigaranye. Bamaze
kurya abwira umwuzukuru we ati “Kivamvari
mwana wanjye, dore tumaze kurya ibiryo twari
dusigaranye. Imvura yarabuze, kandi nta kindi
cyo kurya dufite!”



Kivamvari abyumvise, aratekereza, aratekerezaaa,
maze aravuga ati “aha! Mfite igitekerezo. Simfite
amafaranga yo guhaha, ariko reka mfate inzira
ngende imihanda yose haba mu ishyamba cyangwa
mu mibande, nshake imbuto n’inkeri, buri wese
ashobore kurya ahage.”

Nuko Kivamvari afata inzira ajya mu ishyamba.
Aragenda, aragendaaaa, agenda yivugisha ati “iyaba
nari mbonye umuntu wamfasha akampa imfashanyo.
Nuko arabukwa igitи cy’ibinyomoro ariko acyegereye
abona cyarumye.
Arabukwa igitи cy’indimu ariko akigeze iruhande abona
na cyo cyarumye.
Nuko Kivamvari acika intege, yicara mu nsi y’igitи ngo
aruhuke. Izuba ryari ryacanye cyane. Nuko **agwa**
agacuho maze arasinzira.



Abyutse abona umukecuru wari uhagaze aho.
Yari afite **imvi** nyinshi. Yari afite indoro y'umuntu
w'umuuhanga. Yari ateruye mu ntoki ze icyungo gifite
indiba nini, gisa n'akabindi gato.

Wa mukecuru abaza Kivamvari ati “urimo gukora
iki hano muri iri shyamba, mwana wa?” Kivamvari
aramusubiza ati “jye na nyogokuru nta biryo dufite
mu rugo. Naje muri iri shyamba gushakashaka imbuto
zo kurya, ariko nahebye, kuko ibiti byose byarumye.”
Umukecuru abyumvise amugirira impuhwe maze
amuhereza cya cyungo cye.




Umukecuru aramubwira ati “dore iki ni icyungo gitangaje.” Bavuga ko umwami Ruganzu ari we wagihaye umugisha. Iyo ukibwiye uti “teka, teka cyungo gitangaje, teka, giteka imboga ziryoshye.” Yongeraho ati “ikindi kandi iyo ukibwiye uti ‘Mvutumvutumyatu’ kirekeraho guteka, kuko ayo ari amagambo adasanzwe.”

Kivamvari yitegereza icyungo gitangaje maze aratangara ati “icyungo gitangaje! Nta muntu wagira inzara afite iki cyungo rero!”

Umukecuru yitegereza Kivamvari maze aramwenyura ati “ibyo ni byo ariko ugomba kugikoresha gusa mu gihe cy’**amapfa**, ibiryo byabuze. Yongeraho ati “ikindi kandi, ugomba no gusangira n’abandi ibiryo utetse muri iki cyungo. Uramutse wanze gusangira n’abandi cyangwa ugakoresha iki cyungo bitari ngombwa, iki cyungo gitangaje cyarakara maze byose bikaba imfabusa. Ngaho rero kijyane maze uzagikoresha neza.”

Kivamvari ashimira umukecuru kandi amwizeza ko azagikoresha neza, agasangira n’abandi kandi akagikoresha aho biri ngombwa gusa, nuko basezeranaho isubira imuhira.




Kivamvari atunguka mu irembo ry'urugo kwa nyirakuru ateruye cya cyungo. Nyirakuru abonye Kivamvari yikoreye icyungo aratangara. Aravuga ati “icyo cyungo ni icyo gukoresha iki, ko nta byo kugitekamo dufite?”

Kivamvari araceceka, ahubwo agitereka ku mashyiga. Aracyegera, aratangira aravuga ati “teka, teka cyungo gitangaje, teka!” Muri ako kanya, icyungo gitangaje giteka imboga.

Nyirakuru abibonye aratangara, maze aravuga ati “mbega icyungo gitangaje!” Nuko yitegerezza uko icyungo giteka. Kirateka, kirateka, kugeza ubwo imboga zatangiye kumeneka.

Nyirakuru aramubaza ati “none se kirekera aho guteka bigenze gute?” Kivamvari aramusubiza ati “iyo umuntu akibwiye ngo “Mvutumvutumyatu”, kirekera aho guteka.”



Bidatinze Kivamvari yibuka amagambo ya wa mukecuru, nuko ahamagara abaturanyi babo ngo basangire imboga zatetswe n'icyungo. Abantu bose bashimira Kivamvari na nyirakuru kubera izo mboga zatetswe n'icyungo gitangaje.

Uko iminsi yashiraga, abantu bo muri ako karere bose bakomezaga kubona ibiryo bihagije muri ibyo bihe by'amapfa kubera icyo cyungo gitangaje.



Hashize amezi menshi, imvura iragwa, ibihingwa biramera. Amasaka, uburo, ibigori birera. Ibiti by'imbuto na byo byeze imyembe, indimu n'avoka nyinshi.

Abaturage b'aho hantu baje guhinduka abanebwe, banga guhinga no gusarura imbuto. Umunsi umwe bagiye gusura Kivamvari baramubwira bati “wakoresha icyungo gitangaje ukajya udutekera imboga? Ntidushaka kujya mu mirima guhinga. Dore harashyushye kandi guhinga biragora cyane. Twabonye ufile icyungo gitangaje gishobora kudutekera imboga ziryoshye.” Kivamvari abanza gushidikanya ariko abaturage bamurembeje, yemera gukoresha icyungo gitangaje ku nshuro ya nyuma.





Nuko kivamvari atereka cya cyungo gitangaje ku mashyiga maze aravuga ati “teka, cyungo gitangaje, teka!” Maze icyungo gitangaje kirateka. Abaturage barishima. Nuko bose begera icyungo gitangaje bakajya bashyiramo ibiyiko barura imboga bashyira ku mbehe zabo. Bamaze guhaga nyirakuru wa Kivamvari aravuga ati “Mvutumvutumyatu!” Icyungo gitangaje kirakomeza kirateka. Arongera mu ijwi riranguruye ati “Mvutumvutumyatu!” Icyungo gitangaje kirakomeza kirateka. Kivamvari na we azamura ijwi aravuga ati “Mvutumvutumyatu!” Icyungo gitangaje kirakomeza kirateka. Nuko imboga zigera ubwo zimeneka, ziratembra zigera no mu nzira.



Abaturage barumirwa bayoberwa icyo bakora kugira ngo bahagarike izo mboga. Baribaza bati “twakoze iki kugira ngo iki cyungo cyivumbure bigeze aha?”

Bidatinze bagiye kubona babona wa mukecuru w'imvi wahaye Kivamvari icyungo gitangaje. Arabitegereza maze abarebana umujinya n'akababaro, aravuga ati “Ndababaye cyane. Nababwiye ko mugomba gukoresha iki cyungo neza. Mwababye **intumva**. Mwakoreshheje icyungo mu gihe mufite imyaka mwasarura kubera ko mwahindutse abanebwe mudashaka gukora. Kuva ubu mugomba kwishakira ibiryo mu gihe cy'amapfa.” Nuko amaze kuvuga ibyo aterura cya cyungo ku mashyiga aragenda, arinda arenga bose bakimuhanze amaso. Kuva ubwo, nta wongeye **kumuca iryera**.

Inyunguramagambo

- **kugwa agacuho:** Gusinzira ugaheza kubera umunaniro mwinshi.
- **imvi:** imisatsi y'umweru akenshi iterwa n'uko umuntu ageze mu za bukuru.
- **amapfa:** inzara iterwa n'izuba ryinshi ryavuye maze imyaka yose ikuma.
- **intumva:** umuntu udakurikiza inama bamugiriye akikorera ibitandukanye n'ibyo bamubwiye.
- **ntibongera kumuca iryera:** ntibongera kumubona ukundi.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa muri iyi nkuru?
2. Mu ntangiriro y'iyi nkuru Kivamvari na Nyirakuru bari bafite kibazo **ki**?
3. Kivamvari yabigenje **ate** ngo akemure ikibazo bari bafite?
4. Icyungo gitangaje yagikuye **hehe**?
5. **Kubera** iki icyungo gitangaje cyanze kurekera aho guteka imboga?

Amategeko y'inyamaswa


AMATEGEKO Y'INYAMASWA :

- Itegeko rya
1: Gukora imyitozo ngororamubiri buri munsi
Itegeko rya
2: Kurya ibribwa birimo intungamubiri
byiganjemo imbuto n'imboga
Itegeko rya
3: Kugira isuku
Itegeko rya
4: Kubana mu mahoro nta kuryana , nta
ntonganya , nta ntambara

Yanditswe na L3 Initiative
Yashushanyijwe na Seif Bizimana

Kera cyane, hateye **icyorezo cy'indwara** zidasanzwe mu ishyamba rya Ntenyo. Buhoro buhoro inyamaswa zose zigenda zifatwa n'uburwayi. Imparage zarwaye **inkabya** ku mubiri, Twiga zigahora zinaniwe, zisinzira igihe cyose, intugu zazo zigenda ziheta buhoro buhoro. Inturo zo zagendaga zibyimba buhoro buhoro mu majigo yazo. Inzoka, zaba incira cyangwa incarwatsi zo zatangiye kuvuvuka no **kugira umwera** ku mubiri. Inyoni zo zari zarahunze iryo shyamba zose.

Ibyo byahangayikishije cyane intare umwami w'ishyamba. Yababazwaga cyane n'uburyo inyamaswa zose zigenda zirushaho kuremba, n'uburyo amajwi meza y'inyoni zo mu ishyamba yari yarasimbuwe n'imiborogo. Inkorora yari imaze **kuba nk'icyorezo** mu nyamaswa zose z'ishyamba.



Nuko Intare umwami w'ishyamba ihamagara abajyanama bayo mu nyamaswa ngo zifatanye gushaka umuti w'icyo kibazo. Irazibwira iti “ncuti zanje, tugomba kwiga ku kintu twakora ngo duhagarike iki cyorezo.” Abo bajyanama barimo inyamaswa **z'inararibonye**, ariko ntizari zarigeze zibona icyorezo nk'icyo kuva zabaho. Byari bigoye kukibonera umuti pe!

Izo nyamaswa zamaze igihe kirekire cyane zitanga ibitekerezo ku muti w'icyo cyorezo ariko nta cyo zagezeho. Nuko, **uruvu** rwari umukuru muri izo nyamaswa rwiyemeza kujya kubwira intare umwami w'ishyamba ko zagerageje ariko nta cyo zigeraho. Intare ikimara kumva iyo nkuru mbi, yagize intimba, ariko itekereje ko inyamaswa zikomeje gupfa irazibwira iti “mwagerageje, ariko ubu. nimutahe mujye kurwaza inyamaswa zo mu miryango yanyu.”



Iryo joro, intare ntiyasinziriye. Yari ihangayitse cyane yibaza uko bizagenda. Yari yarigeze kumva inkuru ivuga ko inyamaswa zo mu yandi mashyamba **zishishe** kandi zifite ingufu, ko zihora zishimye, nta burwanyi buzirangwaho.

Nuko yiyeza gutumira inyamaswa zose z'ishyamba ngo izohereze kureba uko izo nyamaswa izo nyamaswa zindi zibayeho n'uko zibigenza ngo zihorane ubuzima bwiza.


Mu gitondo cya kare, intare yatumyeho inyamaswa zose nk'uko yari yaraye ibiyemeje. Intare itangazwa cyane n'uko inyamaswa zashoboye kwitabira ubwo butumire zari imbata, inkotsa n'impara gusa. Intare izibwira ko zigomba gushaka umuti kandi zikawubona vuba bishoboka.

Zemeranywa ko imbata izoga mu ruzi rwari hafi y'iryo shyamba ikagera ku nkombe hakurya y'uwo mugezi ikitegerezza uko inyamaswa zaho zibayeho. Inkotsa yo yiyeze kuguruka ikagera kure cyane ikareba uko inyamaswa zo mu kirere zibayeho. Inkima zo ziyeza gutembera mu mashami y'ibiti byo mu mashyamba atandukanye zitegerezza uko inyamaswa zaho zibayeho.

Intare yazibwiye ko buri nyamaswa yose muri izo igomba kugaruka izanye amakuru y'uburyo icyo cyorezo cyacika. Yarazibwiye iti “ngaho nimugende kandi mwese mbabone hano mbere y'uko izuba rirenga, ntimutinde.”




Imbata yahise yiroha mu mazi ako kanya. Igeze ku nkengero y'uruzi, ibona inzovu nyinshi zari hakurya mu ishyamba. Bwari ubwa mbere iyo mbata ibonye inzovu. Yamaze umwanya munini yitegereza inzovu zikarabya abana bazo, zinywa amazi meza zisarura n'imbuto ku biti, zisangira n'abana bazo. Ibyo imbata byarayishimishiye cyane iribwira iti “ziriya nyamazwa zirashishe kandi zirishimye. Ndaza kubwira umwami w'ishyamba ibyazo.”



Inkotsa yo yarimo iguruka hejuru mu kirere yitegerezza inyamaswa nyinshi zishishe kandi zishimye. Yagurutse igihe kirekire cyane kugeza ubwo yahuraga n'inkende nyinshi zarimo zisimbuka ziva mu giti kimwe zijya mu kindi zisangira n'abana bazo imineke, inkeri n'intoryi. Ibyo inkotsa byarayishimishiye cyane iribwira iti “ziriya nyamazwa zirashishe kandi zirishimye. Ndaza kubwira umwami w'ishyamba uko zibayeho.”



Impara yo yari iri kwiruka mu mukenke mu mashami y'ibiti by'inturusu mu mashyamba yari hafi aho, yumva akuka keza kavaga mu byatsi, imboga n'imbuto byari hafi aho. Mu gihe yari iri kwiruka ishakisha umuti, yabonye imbogo nyinshi zarimo zirisha **igikaranka**. Ibyo Impara byarayishimishiye cyane iribwira iti “ziriya nyamaswa zirashishe kandi zirishimye. Ndaza kubwira umwami w'ishyamba uko zitwara.”



Mbere y'uko izuba rirenga, izo nyamaswa soze zari zagarutse mu ishyamba ryazu. Nuko imbata muri zo ifata ijambo iti “nageze kwa Nzovu, nditegereza ndarebaaaa, mbona inzovu zigira isuku cyane. Zirakaraba kandi zigakarabya n'abana bazo, zikanywa amazi meza kandi zikarya imbuto nk' inkeri, imboga, intoryi n'ibindi.”

Inkotsa na yo ikurikiraho, ibwira intare iti “nageze kwa Nkende, nditegereza ndarebaaaa, mbona inkende zikora imyitozo ngororamubiri, mbona kandi zirya imbuto n'imboga byinshi.”

Impara na yo ikurikiraho, ibwira intare iti “nageze kwa Mbogo, nditegereza ndarebaaaa, mbona imbogo zirisha igikaranka gitoshye zishimye.”

Ibyo byashimishije inyamaswa nyinshi, ziyemeza kubikora na zo. Intare ariko yo ntabwo yemeye ko kuba izo nyamaswa zirya ibyatsi, imbuto n'imboga ari byo bituma zishisha.



Impamvu ni uko yakundaga kurya inyama cyane ariko inyamaswa zimwe na zimwe zo zikundiraga kurisha. Ntizashakaga kurya inyamaswa zingenzi zazo. ziyumvishaga ko inyamaswa zose ziriye inyama havuka intambara mu ishyamba kuko zajya zishaka kuryana.

Nuko intare umwami w'ishyamba ifata ijambo iravuga iti “mwese mutege amatwi. Kuva ubu, buri nyamaswa yose yo muri iri shyamba izajya ikurikiza kandi yubahirize amategeko akurikira:

Itegeko rya 1: Gukora imyitozo ngororamubiri buri munsi.


Itegeko rya 2: Kurya ibiribwa birimo intungamubiri byiganjemo imbuto n'imboga.

Itegeko rya 3: Kugira isuku.

Itegeko rya 4: Kubana mu mahoro nta kuryana , nta ntonganya , nta ntambara.”

Nyuma y'ibyo, inyamaswa zose zishimiye ayo mategeko kandi ziyashyira mu bikorwa .

Nuko bidatinze, ishyamba rihinduka **icyanya** **cy'inyamaswa** zishishe, zishimye kandi zizira kurwara.



AMATEGEKO Y'INYAMASWA :

Itegeko rya
1: Gukora imyitozo ngororamubiri buri munsi

Itegeko rya
2: Kurya ibiribwa birimo intungamubiri
byiganjeno imbuto n'imboga

Itegeko rya
3: Kugira isuku

Itegeko rya
4: Kubana mu mahoro nta kuryana , nta
ntonganya , nta ntambara

Inyunguramagambo

- **icyorezo cy'indwara:** indwara yaduka ikandurwa n'abantu benshi kandi ikabahitana.
- **inkabya:** inturugunyu zibyimba mu mikaya cyane cyane ahari ikinure, zikamera nk'ibibyimba. Zikunze gufata mu ngingo, mu ihuriro ry'amagufwa.
- **kugira umwera:** kugira uruhu rutanoze, biba akensi ku gihe cy'izuba iyo umuntu akaraba ntiyisige amavuta.
- **inararibonye:** umuntu ufite ubumenyi bwinshi bitewe no kuramba.
- **uruvu:** agasimba ko mu ishyamba kameze nk'umuserebanya karangwa no guhinduranya amabara gafata ibara ry'ikintu kariho.
- **zishishe:** zibybushye.
- **inkotsa:** ni inyoni yo mu ishyamba igira urusaku rwinshi, ahensi bakayitirira kuranga amakuba.
- **igikaranka:** uwoko bw'ibyatsi byo mu ishayumba bikundwa n'inyamaswa zirisha kubera uburyohe bwabyo.
- **icyanya cy'inyamaswa:** aho inyamaswa zikoraniye ari na ho ziba cyangwa se zororerwa.


Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo uje ubasaba kuzamura urutoki rumwe rumwe, bakubwire igisubizo.

1. **Ni izihe** nyamaswa zivugwa muri iyi nkuru?
2. Iyi nkuru yabereye **he**?
3. **Ni iki** cyateye umwami w'ishyamba kubabara?
4. Umwami w'ishyamba yakoze **iki** kugira ngo akemure ikibazo inyamaswa zari zifite?
5. Inyamaswa zo mw'ishyamba zakiriye **zite** amategeko zahawe?

Ngabo n'insenda



Yanditswe na L3 Initiative
Yashushanyijwe na Munyurangabo Jean de Dieu

Umunsi umwe, mu gihe cy'itumba, Ngabo
yatashye mu rugo ananiwe cyane. Yari afite
imbeho, kandi ashonje bikabije. Nuko akingura
umuryango, yinjira mu rugo iwabo yumva
impumuro nziza y'ibitunguru n'injugu. Agenda
akurikiye iyo mpumuro, agera aho nyina yari
arimo akata imboga aganira n'umuturanyi
Mukansanga agira ishyushyu ry'ibyo biryo nyina
yarimo ategura.




Ngabo yahise ahamagara nyina aramubwira ati
“mama, ko nshonje cyane nabona icyo kurya?”
Nyamara nyina ntiumvise kubera ibiganiro
yagiranaga n’umuturanyi we Mukansanga.



Ngabo aratekereza ati “sinashobora gutegereza ko ziriya mboga mama agiye guteka zishya.”
Nuko asubira mu nzu, arabukwa imboga
n’imbuto ku meza maremare mu nguni.

Nuko arisimbukuruza maze afatisha **agakonjo** ke
ku meza, afata kuri za mboga aratamira.



Muri ako kanya, iminwa ye itangira guhinda umuriro, amaso ye atangira kubungamo amarira, ururimi rwe rutangira kuvubukamo amacandwe menshi.

Ngabo aratabaza cyane ati “insendaaaa, insendaaa, insenda weee!” Akavuga ibyo ahungiza akayaga ku munwa we. Nyina na Mukansanga ntibamenye ibyabaye. Ntibumvise urwo rusaku rwa Ngabo, kuko barimo baganira, banaseka cyane.



Ngabo yibaza uko nyina aza kwifata nabimenya.
Agira ubwoba maze akizwa n'amaguru.
Yirukankaga yasamye, umunwa ufunguye cyane,
ururimi ruri hanze, akagenda arira ati "urusenda,
urusendaaa, urusendaaa weee." Abona Sebaganji
umwana biganaga akina na murumuna we Libanje.

Ngabo ababonye aratabaza cyane. Akajya
avuga ati "insenda, insendaaa, insendaaaa
weee!"

Sebaganji amubonye araseka cyane. Ngabo
aramubwira ati "winseka sha, ahubwo mfasha."
Sebaganji aravuga ati "ahaaaa! Ndibutse!
Nyogokuru yambwiye ko iyo umuntu ahekenye
ikoma ry'insina, rigabanya kokerwa." Nuko
Sebaganji aca ikoma ry'insina. Arihereza Ngabo
ati "akira iri koma, urikanjakanje." Ngabo afata
rya koma ry'insina, maze ararikanjakanja cyane.


Ariko Ngabo akomeza kurira ati "insenda,
insendaaaa weee!" Isura ye yo mu maso yari
yahindutse umutuku, kubera ubushye no kurira
cyane. Sebaganji abonye ko Ngabo akomeje
kugira ububabare, atangira gushidikanya
, ahhereza irindi koma Ngabo ati "noneho
kanjakanja iri koma, ubanza wari guhekenya iri
ry'insina y'**injagi**." Ngabo yongera gufata ikoma
ry'insina y'injagi, arongera ararikanjakanja.
Bigeze aho, yiruka ajya gushaka undi muntu
w'injijke waba uzi neza umuti wamufasha.



Umunwa wa Ngabo ukomeza kumwokera. Mu kanya gato, abona umusaza Nsabimana wari wicaye ku ibaraza, asoma igitabo. Nuko Nsabimana ahamagara Ngabo aramubwira ati “Ngabo mwana wanje, amaso yanje arananiwe, ngwino unsomere.”

Nyamara Ngabo we, akomeza gusuza ati “insenda, insendaaa weee!” Ngabo akomeza gutabaza . Umusaza Nsabimana abibonye ahita amenya ingorane Ngabo yagize, aramubwira ati “nsingirira ziriya mbuto z’injonjori ziri mu gitebo, maze uzimpereze.”

Nuko wa musaza Nsabimana yinjiza imbuto z’injonjori mu kanwa ka Ngabo, aramubwira ati “ngaho kanjakanja cyane”. Nuko Ngabo arazikanjakanja, arazikanjakanja, ariko umunwa we uguma kokerwa cyane no guhinda umuriro.



Ngabo arabukwa nyina hakurya maze yiruka asubira mu rugo. Nyina yari afite ingufuri mu ntoki ze, aririmba gahoro gahoro. Akebutse umuhungu we abona mu maso he hahindutse umutuku, abona amaso ye yuzuye amarira, umunwa we ufunguye. Nuko ahita amenya ibyabaye ku muhungu we.

Nyina wa Ngabo, afata **injome** vuba vuba, abuganizamo amata yari ari mu cyansi. Nuko ayahereza umuhungu we Ngabo, arayagotomera, arayagotomera, ayamaramo. Ngabo aravuga ati “arakonje wee! Noneho ndumva norohewe.” Nuko amaso ya Ngabo yongera gusa neza, mu maso he haracya nka mbere. Nyina aramubwira ati “ubutaha rero....” Ngabo ahita asubizanya n’ikimwaro, azunguza ingofero yari afite mu ntoki ze, ati “mama, ubutaha sinzongera kwiha ibyo kurya ntabanje kukubwira.”

Nyina aramubwira ati “ubutaha niwongera kugira ikibazo, ntuzongere kugenda ngo unsige utabimbwiye. N’ubwo wabona mpugiye mu mirimo, uzajye umbwira, nzajya ngufasha buri gihe. Uri umwama wanjye kandi ndagukunda cyane.” Ngabo arasubiza ati “ni byo, ntabwo nzongera.” Nyina wa Ngabo aramubwira ati “ikindi, ubutaha nuba ushonje cyane, wafata kuri karoti aho kurya urusenda.” Ngabo na nyina basekera rimwe.



Inyunguramagambo

- **agakonjo:** agace k'ukuboko gahera aho ikiganza gitangiriye kagaherwa n'intoki.
- **injagi:** ubwoko bw'insina yera igitoki kigira amabere maremare kandi gitekwa.
- **injome:** icyansi gito baheramo abana amata.


Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa muri iyi nkuru?
2. **Kuki** ururimi rwa Ngabo rwokeraga?
3. Ngabo arya insenda nyina yari **he**?
4. Ngabo yakoze **iki** kugira ngo ururimi rwe rureke kokera?
5. Nyina wa Ngabo yabyifashemo **ate**?

Uruyuzi rudasanzwe



Yanditswe na L3 Initiative
Yashushanyijwe na Munyurangabo Jean de Dieu


Kera habayeho umuhinzi akitwa Rutinywa.
Rutinywa n'umuryango we bari batuye i
Kanzenze hafi y'uruzi. Rutinywa yari afite
ikibanza gito yahingagamo ibihaza, ibirayi
n'ibishyimbo.

Ijoro rimwe imvura y'amahindu yaraguye,
umuyaga urahuha, inkuba zirakubita,
imirabyo irarabya, amazi yuzura rwa ruzi rwa
Kanzenze maze imirima n'ibibanza byari hafi
yarwo birengerwa n'amazi.



Bukeye Rutinywa agiye gusura umurima we abona ikiraro cyari cyaratinzwe n'abaturage cyasenywe n'iyo mvura. Ibiti byari bikikije ikiraro na byo byari byaguishijwe n'umuyaga mwinshi. Ageze mu murima we asanga ibihaza, ibishyimbo n'ibirayi bye byatwawe n'amazi. Ibantu byose byari byasenywe n'imvura y'amahindu.

Nuko Rutinywa yicara ku ibuye ryari mu murima we yubika umutwe mu biganza bye, atekereza ku murima we wari warahinzwe neza cyane. Atekereza ku mbuto nziza yari yarateye maze arababara cyane. **Yahangayikishwaga** n'uko atari afite amafaranga yo kugura izindi mbuto ngo atere. Yahangayikishwaga n'uko umuryango we ushobora kwibasirwa n'inzara mu bihe bizaza.



Mu gihe yari agitekereza ibyo , abona umugenzi wanyuraga mu kayira kari gakikije umurima we. Uwo mugenzi yari inzobe. Nuko uwo mugenzi aravuga ati “nitwa Nzirorera mvuye kure cyane kandi ndacyafite urugendo rurerure. Wamfasha ukampa aho kuruhukira akanya gato?” Rutinywa yitegereje Nzirorera abona asa n’ufite inzara. Aramubwira ati “ngwino iwanjye ufate icyo kunywa, ndaguha no ku nzusi zikaranze ugabanye inzara.” Rutinywa ntabwo yari umukire ariko yagiraga **impuhwe**.

Nuko arongera abwira wa mugenzi ati “**nguhaye ikaze** mu nzu yanje, turagusasira uruhuke maze uzakomeze urugendo ejo.” Iryo joro Rutinywa n’umuryango we bicaranye na Nzirorera basangira ibyo kurya no kunywa. Nzirorera, yari azi kuganira no kubara inkuru bishimishiye. Nuko ababwira amahanga yagenze n’ibyo yabonyeyo. Ababwira inyamaswa yagiye ahura na zo mu ngendo yagize zirimo inzoka nini, twiga, intare n’izindi nyamaswa. Ababwira ku bihingwa bidasanze yagiye abona birimo inyanya nini cyane, karoti nini cyane n’ibindi. Rutinywa n’umuryango we baratangara cyane. Abana bo bateze amatwi izo nkuru uwo mugenzi yabatekererezaga, maze bakshima bagaseka.



Bukeye, abo mu muryango wa Rutinywa
babyutse, basanze Nzirorera yagiye kuko we yari
yazindutse cyane.

Ku meza yari yahasize ibahasha irimo uruyuzi
rumwe n'ibaruwa yasinyweho na Nzirorera ubwe.
Muri iyo baruwa hari handitsemo ngo “
ndabashimira ubuntu mwangiriye. Uburyo
mwanyakiriye byanyeretse ko nkunzwe.
Nimwakire uru ruyuzi, ruzabatere amahirwe.
Umugenzi Nzirorera.”


Rutinywa yitegereje urwo ruyuzi aratekereza
ati “uru ruyuzi ni ruto cyane, ntirubasha guhaza
umuryango wanjye ariko reka ndutere ndebe ko
rwazavamo igihaza.” Nuko Rutinywa aragenda,
atera rwa ruyuzi mu kibanza cye inyuma y'inzu.



Nyuma y'iminsi mike, agiye kureba urwo ruyuzi, asanga rweze igihaza kinini kandi gishishe. Nuko ahitamo guhita agisarura.

Muri ako kanya abona aho amaze guca igihaza hameze ikindi gihaza. Rutinywa aratangara cyane maze ahamagara umugore we Nyiramanywa kugira ngo aze arebe.


Nyiramanywa yaje yiruka maze na we aca igihaza cya kabiri. Icyabatangaje ni uko bagiye kubona bakabona aho baciye cya gihaza cya kabiri, nanone hongeye kumera ikindi gihaza. Nyiramanywa aravuga ati “ ibi ntabwo bisanzwe! Biratangaje cyane!” Nyiramanywa ahamagara abana be ngo baze na bo barebe icyo gitangaza mu murima wabo.



Abana ba Rutinywa bahageze **bakuranwa** guca ibihaza byagendaga byisukiranya ku ruyuzi, kugeze ubwo bakoze ikirundo cy'ibihaza. Aho baciye igihaza, ni ko hahitaga hamera ikindi. Umwe muri bo avuga mu jwi riranguruye, ahamagara abaturage bari hirya no hino, ati “dufite igihaza kidasanzwe! Dufite igihaza kidasanzwe!”

Mu kanya gato, abaturanye benshi baba barahageze. Batangazwa no kubona mu murima wa Rutinywa harunzwe ibihaza byinshi. Nuko baravuga bati “ibi ntibisanzwe! Iki gihaza ntigisanzwe? Byanze bikunze cyavuye ku nzusi zidasanzwe.” Nuko babwira Rutinywa bati “ese waduhaho?”


Rutinywa yibuka impuhwe n'amahirwe Nzirorera yamuteye mu ijoro baraye baganira ku bihingwa bidasanzwe. Nuko arasubiza ati “yego, ni byo rwose.”



Rutinywa n'umuryango we bagerageza kureba uko ibyo bihaza byasaranganywa neza, ku buryo buri muntu wese yatahanye nibura igihaza kimwe. Nuko bose baranezerwa , baraseka , bakoma amashyi baramushimira.

Nuko Rutinywa arababwira ati “muzafate neza inzuzi zivuye muri ibi bihaza, zirindwe icyazangiza, nk’ imbeba n’ibindi, hanyuma muzazitere maze muzirebere.”

Nuko abantu bose bataha bivugisha batu “mbega inzuzi zidasanzwe! Mbega igihaza kidasanzwe! Ntituzongera kugira inzara ukundi!”



Inyunguramagambo

- **ikibanza:** ahantu hagenewe kubakwa.
- **guhangayika:** kubura umutuzo bitwe n'ibikugoye utabonera igisubizo.
- **impuhwe:** imbabazi zitwe n'ubuntu n'urukundo rwo kumva wafasha umuntu ubabaye.
- **guha ikaze:** kwakira umuntu iwawe unamwifuriza kugubwa neza, kwemerera umuntu kwinjira iwawe kandi ukamwifuriza kugubwa neza.
- **kwakuranwa:** gusimburana gukora ikintu, umwe avaho undi ajyaho gutyo gutyo.


Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa muri iyi nkuru?
2. **Ni iyihe** mpano idasanzwe Nzirorera yahaye umuryango wa Rutinywa?
3. **Ni gute** umuryango wa Rutinywa wabonye impano idasanzwe y'uruyuzi rumwe?
4. **Ni hehe** Nzirorera yashyize ibihaza byeze ku ruyuzi rudasanzwe?
5. **Ni kuki** Rutinywa yahisemo gusangira ibyo bihaza n'abaturanyi be?

Inka ya Karangwa yarazimiye



Yanditswe na L3 Initiative
Yashushanyijwe na Dolph Banza

Kera habayeho umugabo witwaga Karangwa. Karangwa uwo yabanaga n'umukobwa we Njunguri hafi y'ishyamba rya Nyungwe. Karagwa ntiyari akennyē, kuko yari umuhinzi akaba n'umworozi w'inka. Muri izo nka harimo inka imwe **y'ingweba**. Iyo nka Njunguri yarayikundaga cyane.

Mu nka zose bari batunze, iyo ni yo yakamwaga amata menshi kurusha izindi. Byongeye kandi amavuta yayo yabaga ari umuhondo kurusha ay'izindi nka bari batunze.

Amafaranga yavaga mu mata no mu mavuta y'inka babaga bagurishije, Karangwa yayishyuriraga umukobwa we Njunguri mu ishuri.



Umunsi umwe, Karangwa yarabyutse agiye kureba mu kiraro asanga ya nka y'ingweba nta yirimo. Nuko **ariyamirira** cyane ati “ayi weee! Ya ngweba yanje yigendeye!” Yagerageje kuyihamagara no kuyishakira hafi aho hose afatanyije na Njunguri ariko barayibura. Karangwa n’umukobwa we Njunguri byarababaje cyane. Bumvaga bahangayikishijwe n’uko iyo nka yaba yaburiye mu ishyamba rya Nyungwe, cyangwa ikaba yahuye n’ingwe zikayica.

Bamaze igihe kinini bayishakisha bigeze aho Karangwa aravuga ati “yewe nta yo tubona pe! Iri shyamba ni rinini cyane!” Njunguri yabonye ukuntu se atangiye gucika intenge aramubwira ati “humura papa! Humura rwose njyewe ndumva mfite icyizere ko tuyibona.”




Bakiri muri ibyo, Sebakannyi umuhinzi bari baturanye aba abaciyeho ajya ku kazi, arahagarara arababaza ati “byabagendekeye gute se Karangwa we? Ko mbona mumeze nk’abahuye n’**ikibazo cy’injyanamuntu?**” Karangwa aramusubiza ati “wahora n’iki nshuti yanje! Ikibazo twagize ni injyanamuntu koko!” Nuko yongeraho ati “ingweba yacu yazerereye muri iri shyamba rya Nyungwe, none twayibuze burundi!” Sebakannyi aramusubiza ati “yoo! Birababaje! Reka mbafashe kuyishaka.” Nuko ibihingwa yari yikoreye abisiga aho baragenda.




Karangwa, Njunguri na Sebakannyi bakomeje kuyishakisha. Baza guhura na Njyamubiri avuye kwasa ibiti mu ishyamba. Njyamubiri ababonye yarahagaze arababaza ati “byabagendekeye bite se Karangwa we? Ko mbona mumeze nk’abahuye n’ikibazo cy’injyanamuntu?”

Karangwa yaramusubije ati “wahora n’iki ncuti yanjye! Ikibazo twagize ni injyanamuntu koko!”

Nuko yongeraho ati “ingweba yacu yazerereye muri iri shyamba rya Nyungwe, none twayibuze burundi! Dufite ubwoba ko yaba yishwe n’ingwe!” Nuko inkwi yari yikoreye azisiga aho bajyana gushaka iyo ngweba.



Karangwa, Njunguri, Sebakannyi na Njyamubiri
bakomeje kuyishakisha kugeza bahuye na
Ngwabije umubyinnyi mu itorero ry'Akarere,
akaba n'umukinnyi w'umupira w'amaguru
avuye mu myitozo. Ngwabije ababonye
yarahagaze arababaza ati “byabagendekeye
gutese Karangwa we? Ko mbona mumeze
nk'abahuye n'ikibazo cy'injyanamuntu?”
Karangwa yaramusubije ati “wahora n'iki nshuti
yanje! Ikibazo twagize ni injyanamuntu koko!”
Nuko yongeraho ati “ingweba yacu yazerereye
muri iri shyamba rya Nyungwe, none twayibuze
burundu! Dufite ubwoba ko yaba yishwe
n'ingwe!” Nuko Ngwabije umupira yari afite
awusiga aho baragenda.



Inkuru y'ibura ry'iyo ngweba yari yamaze **kuba kimomo**
ku musozi aho Karangwa n'umukobwa we bari batuye.
Karangwa, Njunguri, Sebakannyi, Njamubiri na
Ngwabije bageze hagati mu ishyamba rya Nyungwe,
bahasanze abaturanyi babo babategereje hamwe
n'abana biganaga na Njunguri.

Bose bahise birara mu ishyamba basubira kuyishakisha.
Bagendaga mu itsinda rimwe kugira ngo hatagira
inyamaswa z'ishyamba zibagirira nabi. Bakomeje
kuyishaka bagiye kumva bumva ijwi rimeze nk'iry'inka
hakurya y'umugezi rigira riti “Mbaaa! Mbaaa!”
Karangwa yarababwiye ati “shiii! Nimuceceke
twumve.” Nuko bose batega amatwi.



Urwo rusaku rwakomeje kwiyongera. Hashize akanya, bose bahinnye amapantaro yabo maze bambuka uwo mugezi bagana aho iryo jwi ryaturukaga. Bageze hakurya y'umugezi babonye ya ngweba iryamyē mu ishyamba. Mu gihe bageragezaga kuyegera, yongeye kwabira iti “mbaaa! Mbaaa!” Muri ako kanya bongera kumva akajwi gasa n'ak'umutavu kati “maaa! Maaa!”

Bitegereje neza babona iruhande rwayo umutavu! Bose baratangara, barishima cyane. Karangwa yarayegereye arayagaza ati “yooo!, mbega amahirwe! ngweba yanje, ni ukuri nari nzi ko tutakikubonye pe!” Yongeraho ati “urakoze cyane ngweba yanje! Wajyaga uduha amata n'amavuta meza, none koko uduhaye n'umutavu!”

Karangwa yabwiye abari aho ati “nimumfashe tuyihagurutse dutahe.” Uyu munsi mwese muratumiwe. Ndashaka gusangira na mwe ibyishimo ntewe n'iyi ngweba yanje. Nuko bashyira nzira barataha.



Inyunguramagambo

- **inka y'ingweba:** ni ubwoko bw'inka ya kizungu, iba idafite amahembe kandi zikunda kuba ari nini ugereranyije n'izisanzwe bita iz'inyarwanda.
- **kwiyamira:** gutangara.
- **ikibazo cy'injyanamuntu:** ikibazo gikomeye cyane.
- **inkuru yabaye kimomo:** inkuru yasakaye hose, abantu bose bayimenye.


Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa muri iyi nkuru?
2. **Ni ikihe** kibazo Karangwa n'umukobwa we bari bafite mu ntangiriro y'iyi nkuru?
3. **Ni kuki** Karangwa n'umukobwa we bari bafite impungenge?
4. **Ni hehe** Karangwa n'umukobwa we bashakiye inka yabo yari yazimiye?
5. **Ni gute** iyi nkuru yarangiye?

Turwanye Isuri




Yanditswe na L3 Initiative
Yashushanyijwe na Dolph Banza

Igihe kimwe, inyamaswa nyinshi zo ku musozi wa Bwanacyambwe zamaze iminsi ziboroga, zugarijwe n'ikibazo cy'isuri. Izo nyamaswa zarimo imbwa, imbwebwe, ibishwi, imishushwe, Bakame n'izindi. Umutekano wabaye muke cyane. Kuva mu gitondo kugera nimugoba, inyamaswa zose zirirwa ziganya zatabaza.

Mu gicuku, igihe intare umwami w'ishyamba yatahukaga mu cyanya cyayo, yumvise urusaku rwinshi rwirangira. Itega amatwi, yumva inyamaswa zose ziririra icyarimwe. Yinjiye mu mwobo wayo isanga ibyana byayo bimwe byarembejwe n'indwara, ibindi byakomeretse, imyambaro n'ibikoresho byayo byahindutse ibishwangi.



Iyo ntare yari indwanyi cyane, igahora
iharanira kurengera izindi nyamaswa zose.
Iratontoma, irikunkumura, iti “ni ikihe cyorezo
cyabaye hano mu bwatsi bwanjye?” Nuko
ikajya yikubita mu gituza ikavuga iti “ashwi
daaa! Ashwi daaa! Ntibishoboka, habaye iki?
Icyambwira uwateje iki cyorezo, **twashwana pe!**”
Irashwekura, iranyaruka, igenda itera intambwe
ndende cyane, ikwira ishyamba ryose, igenda
iborogaaaa. Ihamagara inyamaswa ,maze zose
zikayikurikira, zikagenda ziririra icyarimwe. Zimaze
guterana, intare umwami w’ishyamba ivuga
irakaye iratontoma, irikunkumura, iti “ashwi daaa!
Ashwi daaa! Ntibishoboka, ni ikihe cyorezo
cyabaye hano mu bwatsi bwanjye ? Nuko
ikajya yikubita mu gituza ikavuga iti “oya oya,
ntibishoboka, habaye iki? Icyambwira uwateje iki
cyorezo, **twashwana pe!**”



Muri ako kanya **imbwebwe** ihaguruka ibabaye cyane iti “Nyagasani, uyu ni umunsi wa karindwi twarabuze amazi yo kunywa. Irebere nawe ukuntu imigezi yose twashokagamo yuzuyemo ibiti, imisundwe n’amabuye, indi yabaye icyondo gusa none abana bacu, na bamwe mu bakambwe b’iwacu barembejwe n’indwara n’inzara, none rero Nyakubahwa mwami w’ishyamba, dutabare.”

Imbwebwe ikimara kuvuga ibyo, igishwi kimwe kirahaguruka, gisuka amarira, gikubita amababa, kiravuga kitu “iri joro haguye imvura y’icyago. Nagiye kumva, numva inzu yanje inguyeho, abana banje barembejwe n’indwara, none rero nyakubahwa mwami w’ishyamba, dutabare.”

Muri ako kanya, umushushwe na wo ukubita amavi imbere y’intare uraboroga, uraborogaaa uti “irebere nawe ukuntu umuvu w’imvura wadutwariye imbwija zose twari twarahinze, ibitumbwe by’imbuto twahinze na byo byashize, inzara iratwishe, none rero nyakubahwa mwami w’ishyamba dutabare.”



Ako kanya intare irazicecekesha ikajya yikubita
mu gituza iti “ashwi daaa! Ashwi daaa!
Ntibishoboka, habaye iki?” Ibwira inyamaswa
zose gushaka bidatinze umuti w’icyo kibazo.
Irazibwira iti “dore abana banje bakomeretse.
Nimudashobora gushaka umuti w’icyo kibazo,
turashwana mwese, mbirukane mwese mumvire
mu ishyamba kuko nta cyo mwaba mumariye.”

Ako kanya inyamaswa zose zitangira **guhwihiwisa**,
zibaza uko zakemura ikibazo. Nuko intare
irongera iratontoma iti “Ni ko Bakame we,
ubwenge bwawe butumariye iki? Sinja numva
ngo uzi ubwenge bwinshi?” Bakame ishya
ubwoba, ipfukama imbere y'intare izamura ijwi
iti “nyagasani nimumpe umwanya , ejo nzabahe
umuti w’iki kibazo.” Intare umwami w’ishyamba
iti “ugatinda bigeze aho? Ejo tuzongere guhurira
hano maze utubwire umuti .”




Bakame **irashwekura** irenga imisozi ibiri,
imisozi itanu, igeze ku musozi wa karindwi,
iratekerezaaaaaa, iribwira iti “reka mpagarare
ndebe abaturage ba hano uko bakora, yenda
ahari nabona ungira inama, akamfasha kubona
umuti w’ikibazo, naho ubundi intare yamerera
nabi pe!” Bakame ihageze, isanga abahinzi
batatu Nyandwi, Murindwa na Mukundwa
batera ibiti. Iritegerezaaa, ibona abantu
benshi barimo bacukura ibyobo birebire bifata
amazi, abandi bacukura amaterasi, abandi
batera ibiti. Iritegerezaaa, ibona umusozi uteye
neza, uteyeho ibiti byiza, ucukuyeho imiringoti
n’amaterasi, maze ibona ko ari byiza. Irishima,
iraseka cyane iti “eheee! Mbonye igisubizooo!
Hehe no gushwana n’intare!”



Bakame iranyaruka, igenda yishimye isimbagurika, maze itunguka imbere y'inyamaswa zose yahagira. Ibwira intare, iti “nyakubahwa, nabonye icyo tugomba gukora, kugira ngo icyorezo cy’isuri kitazongera kudukururira ibyago.” Yongeraho, iti “mwese munkurikire, maze mukore ibyo mberekwa.”

Bakame izijya imbere, ikajya izereka uko zigomba gukora. Iti “buri wese muri twe natere nibura ibiti birindwi, ace amaterasi y’indinganire, acukure ibyobo bifata amazi, kandi ntihazagire uwongera gutema ibiti uko yiboneye. Nimukora gutyo, tuzatandukana n’ibibazo byose twatejwe n’isuri.”

Inyamaswa zose zishima iyo nama, zikurikiza ibyo Bakame izibwiye, maze iwabo hahinduka nko muri paradizooo! Intare ibibonye irishima, maze iraseka iti “heheeee! eheeee! Mbega ibantu byizaaa! Kare kose se iyo mubikora mutyo.” Ishimira inyamaswa zose cyane cyane Bakame, maze irazibwira iti “kuva ubu, isuri ntizongere kugera iwacu.”



Inyunguramagambo

- **gutontoma kw'intare:** urusaku rw'intare, bavuga kandi ko iba iri kwivuga.
- **gushwana:** gutongana.
- imbwebwe: inyamaswa imeze nk'imbwa iba mu ishyamba .
- **guhwihwisa:** kuvuga gahoro wongorera undi kubera ko udashaka ko abandi bumva ibyo umubwira.
- **gushwekura :** kwiruka cyane.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo ujye ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa muri iyi nkuru?
2. **Ni hehe** iyi nkuru yabereye?
3. **Ni kuki** inyamaswa zo mu ishyamba rya Bwanacyambwe zari zibabaye?
4. **Ni iki** cyari cyateje icyorezo ishyamba rya Bwanacyambwe?
5. **Ni gute** inyamaswa zabashije gukemura ikibazo cy'isuri?

Amayeri y'imbeba



Yanditswe na L3 Initiative
Yashushanyijwe na Seif Bizimana

Kera cyane ku muzosi wa Kabugondo hari
hatuye imbeba. Izo mbeba ziberaga mu
mudendezo zishimye, zikidagadura, zikirira inswa.



Umunsi umwe, injangwe yaje gutura aho i Kabugondo. Bwari ubwa mbere imbeba zibonye injangwe. Zikiyibona zarayishimiye cyane. Imbeba imwe muri izo yaravuze iti “ariko di, uriya mushyitsi uje atugana akwiye kuramutswa, tukamwakira, tukamuzimanira ibiryo byatetswe neza . Nimureke dukoraneho tujye kumuramutsa.”

Imbeba imwe muri zo iravuga iti “oya, kubera iki se! N’umutware wacu ntitujya tumuramutsa, nkanswe iriya njangwe tutazi imico yayo!” Imbeba zari aho **zirayitwama** ziti “ceceka se! Uwo ni umuco mubi. Ni ngombwa kuramutsa no kwishimira umushyitsi.”

Nuko imbeba zoze zirikora zijya kuramutsa ya njangwe. Ikizibona yatangiye kwisetsa no kurabya indimi, bidatinze iba itangiye kuzrukankana.


Kuva ubwo, iyo njangwe iranezerwa, ikicara igakubita agatwenge, igasetswa n’uko igize amahirwe yo kujya irya imbeba uko iyishatse. Buri mugoroba, iyo **akazuba kahumbaga**, yahagurutswaga no gutangira guhiga imbeba, ikazrukankana, ikazikurura imirizo kugeza ubwo ifashemo iyo kurarira. Muri icyo gihe, imbeba zose zari zarahiye ubwoba, ku mugoroba, imbeba ntizari zigitembera ku **mudendezo**. Zumvaga zifite ubwoba, ko igihe icyo ari cyo cyose iyo njangwe izazirya.



Umunsi umwe, umutware w'imbeba yatumiye imbeba zose mu nama yo kwiga ku kibazo cy'inqangwe, yari imaze ibyumweru bibiri izituyemo. Imbeba zose zaritabiriye, ziteranira ku kibuga cy'umupira. Zari zihangayitse cyane. Nuko zikajya zimyoza, zikikurura ubwanwa.

Umutware w'imbeba aravuga ati “ndashaka ko dufatanya kwiga ku kibazo cy'iriya njangwe ishaka kutumaraho urubyaro.” Imbeba zose zitera hejuru ziti “yegoxxx, yego rwose!” Nuko imwe muri zo yigira imbere iti “jye rwose ibyayo bimaze kunyobera! Umugambi ni uwo, kuko birakabije. Ariko ndabona iriya njangwe nititonda, izakomeretswa n'umwe muri twe.”

Umutware wazo ibyo byaramushimishije cyane. Yarazibwiye ati “muhumure rwose nidufatanya tuzayikiza.” Yongeraho ati “mukomeze gutekereza ku buryo twabigenza, hanyuma intwererano iyo ari yo yose muzakenera muzayimbaze. Amafaranga yo kwirwanaho amaze igihe abitswe mu **mutamenwa**.”



Muri ako kanya imbeba zahise zitangira **kujujura**. Zamaze umwanya munini zibaza ku kintu zakora ngo zimeneshe iyo njangwe. Kera kabaye, imbeba imwe muri zo irahaguruka isaba ijambo. Yarazibwiye iti “murabizi se, injangwe zikunda gusinzira cyane. Ni ngombwa ko dutekereza ukuntu igihe cyose iriya njangwe izajya ishaka gutangira gusinzira izajya ihita ibyutswa n’umwe muri twē, maze tukayibuza amahoro .”


Umutware wazo yarayisubije ati “icyo ni igitekerezo cyiza, ariko se, ni nde muri mwe wumva yaba intwari ku buryo yashobora gukangura injangwe isinziriye?” Umutware wazo avuze atyo, imbeba zose zaricecekeye habura n’imwe yasubiza.

IBIRO BY'UMUDUGOD
WA KABUGONDO

Umutware w'imbeba yongeye kuvuga ati “nkeneye umuti w'iki kibazo kandi byihutirwa.” Nuko indi mbeba irahaguruka iti “mwaretse se tugacura intwaro nyinshi zitandukanye, tukajya twirinda? Ibyo ari byo byose iriya njangwe ntiyadutinyuka dufite intwaro, n'iyo yabikora yakwibona yatwitswe!”

Umutware w'imbeba yaravuze ati “oya, gukoresha intwaro cyangwa se gutwika iriya njangwe byaba ari ubugome bukabije. Mukomeze mutekereze neza, kandi mutegetswe kuva aha mumpaye umuti w'iki kibazo.”


Imbeba zagumye muri ibyo bitekerezo nyuma y'igihe gito akabeba gato muri zo gasaba ijambo kati “ibyo umutware wacu avuze ni byo! Tugomba gukoresha ubwenge bwacu tukikiza iyi njangwe.” Nuko gaherako gasaba umutware wazo igehe gito, nyuma yacyo kagatanga umuti w'icyo kibazo.



Iryo joro, ako kabeba **ntikigeze kagoheka**. Karaye kicaye gatekereza, gasoma, kagenda kandika mu ikayi yako, gashushanya kugeza ubwo gateguye neza umugambi wo kwirukana iyo njangwe.

Bukeye, ako kabeba kazindukiye mu biro by'umutware wazo, kamwerekwa ibishushanyo byako kamubwira ibijyanye n'umugambi kari karaye gacuze.

Umutware yagateze amatwi ashidikanya. Yaravugaga ati “ndibaza icyo aka kabeba gato gashaka kuvuga. Utubeba duto sinja ntwemera kuko tugira ubwoba.” Nyamara kuko nta wundi muti yari afite apfa kubyemera agatega amatwi. Ako kabeba katangarije umutware wazo ko nyuma y'iminsi ibiri, umugambi wako uzajya mu bikorwa maze injangwe ikazaba yahagaritswe.



Ako kabeba kahise kajya ku isoko kugura imbaho, imisumari n'igitambaro cyatatswe amabara menshi y'ikigina. Kageze mu rugo nyina yarakabajije ati “ibyo se kandi uzanye ni iby'iki?” Ako kabeba karamusubije kati “ceceka mama, ceceka ahubwo mfasha utu tubaho ntwinike hanyuma mu kanya gato ntwinure nindangiza ntwanike ubundi ntwikirizeho iki gitambaro, maze wirebere.”

Ako kabeba kakoze amanywa n'ijoro. Imbeba ngenzi zako, na zo zamaze icyo gihe cyose zitegereje kumenya icyo ako kabeba kagezeho. Nuko bukeye gasohoka iwabo gakurura urubwa runini rw'ikigina kerekeza mu kibuga aho izindi mbeba zari zigategerereje.



Kagitunguka, imbeba zose **zakwiriye imishwaro**. Ako kabeba Kabibonye gatyo kazihamagara kongorera kati “nimuhumure nimuhure. Iki mfite ntabwo ari imbwa ni igikinisho cy’imbwa cyaraye gitatswe nanje. Ngaho nimuceceke injangwe ntigomba kubimenya na gato.”

Nuko kazibwira uko umugambi wako wagombaga gushyirwa mu bikorwa. Imbeba zose zinjiye mu nzu maze zitegereza injangwe. Cya kibwa cyo, zabisize hanze aho mu kibuga kugira ngo kize gukanga ya njangwe.



Umugoroba ugeze, za mbeba zarabutswe ya njangwe iza yomboka, igana aho zari ziri nk'uko byari bisanzwe. Zarayiretse ikomeza kuza, igeze hafi cyane ya cya kibwa zivugira icyarimwe ziti “wuuu, wuuu, wuuu, wuuu, wuuu, wuuu ” Ya njangwe ibonye icyo kibwa, yumvise n'ayo majwi yiruka kibuno mpa amaguru, maze igenda itaka iti “yebaba weee, imbwaaa, imbwaa weee! Iranyishe weee!” Iyo njangwe yagiye ubutazagaruka. Kuva ubwo imbeba zo ku musozi wa Kabugondo zongera kubaho mu mudendezo.



Inyunguramagambo

- **gutwama:** gukangara umuntu wakoze amakosa cyangwa wavuze ibidakwiye.
- **akazuba gahumbije:** izuba rigabaniye ubukana.
- **umudendezo:** amahoro asesuye ajyanye no kuba ufite ibikenewe mu buzima, bikaguha umutuzo no gukora icyo ushaka. Imibereho itarimo imihangayiko.
- **umutamenwa:** isanduku ikoze mu cyuma gikomeye cyane yagenewe kubikwamo amafaranga.
- **kujujura:** kuvuga gahoro mubwirana kandi muvugira icyarimwe musa n'abatishimiye ikintu iki n'iki.
- **ntikigeze kagoheka:** ntikigeze gatora agatotsi, ntikigeze gasinzira.
- **zakwiye imishwaro:** zarahunze ziruka zigana mu byerekezo bitandukanye.

Ibibazo 5 by'ingenzi



Icyitonderwa: Reba ko abana bumvise inkuru neza, ubabaza ibibazo 5 by'ingenzi. Uko ubabajije ikibazo uje ubasaba kuzamura urutoki rumwe rumwe, bakubwire igisubizo.

1. **Ni ba nde** bavugwa muri iyi nkuru?
2. **Ni hehe** iyi nkuru yabereye?
3. **Ni kuki** injangwe yishimye ibonye imbeba?
4. **Ni ikihe** kibazo imbeba zo kuri uyu musozi zaje kugira?
5. **Ni gute** imbeba zakemuye icyo kibazo?

Inyandiko zifashishijwe

"The Magic Pot" Yakuwe ku rubuga rwa interineti. <http://www.gutenberg.org/ebooks/12888>. Ku wa 14 Nzeri, 2013.

"The Three Little Pigs" Yakuwe ku rubuga rwa interineti. <http://www.gutenberg.org/ebooks/18155>. Ku wa 31 Mata, 2013.



MURAKAZA NEZA
I KABUGONDO, UMUJYI
WA BENE MBEBA